

Sw Luhzaz Laiz Kauqfaengz Yezsuz

Haxdoq Daenh Baenzaqrawz

Laiz Bwnz Sw Naeh

1¹⁻²Tih'azfaezloah laux saeq aj, gux haxdoq mawz:

Le bi zawjraeuz naeh, suq kauq dij Sen hax naeh, haeuz baenz zaeh. Suq saeh naeh, le bi zawjraeuz naeh, miz dij goanz ndaej ta taen singjringh, ndaej daeqdeg daekgoanq taen taeng doaklaeng, paenqdix ndaej taen daengzle nauq. Paenqdix aeu sowh saeh naeh laemh dwk daenh, laemh dwk piu. Haeuz miz lai goanz taeuq aeu sowh saeh naeh laiz mwz ndaw sw. ³Suq saeh naeh gux goj haeuz cham ndowj taeuq, haeuz hoak yowngh hoak yowngh cham yaq. Gux nwh maz baenz daeuq aeu dix laiz mwz ndaw sw, daeq gaenq daekgoanq laiz goq daeuj daeuj, yaq aeu hawj mawz, ⁴hawj mawz ruxndeq sowh saeh daenh laemh dwk mawz naeh zawh gaenq zaeh gangq.

Bin Dij Sen Hax Yezhanq Zaekgaj Zowngx

⁵Zwz Cizlih yuq mbanj Yaeuhdaq hoak hongz naeh, miz goanz puj mbud dij Sen ux, minxzwh rongx hoak Saxzazliqyaq, dix daj boangx Yaqbixyaq naeh hoak zaemh boangx.^a Mijmez dix Yixliqcazbowh zawh luglan Yaqlunh.^b ⁶Doiq dix biak daengzle sowh gaenq dij Sen nemz naeh

daj goizdingq naeh, gaeng goj gaemz hax mboq miz, yuq ndaw zaw dij Sen doiqdix zawh puj ndae. ⁷Gaj Yixliqcazbowh mboq rux zowngx lug, doiqdix mboq miz lug, daengz song goanz dix haeuz baenz puj jeq. ⁸Ndauj gaengnaeh, laenh zoah Saxzazliqyaq daj boangx dix naeh mwz rownz dij Sen kvej. ⁹Laemh zwz naeh, puj mbud dij Sen zauh, daengzle maz ipqen, ip zoah gawz, gawz zoq mwz ndaw rownz dij Sen diamj ciang. Mbaed naeh ip zoah Saxzazliqyaq, dix zoq mwz ndaw rownz dij Sen diamj ciang. ¹⁰Gau dix mwz ndaw rownz dij Sen diamj ciang naeh, goanzlai daengzle yuq baihnog daj dij Sen hax kauq. ¹¹Gaunaeh, miz goanz bin dij Sen ux, og daeuj ndaw aen rownz dij Sen naeh, in yuq baih qensa dih diamj ciang naeh. ¹²Saxzazliqyaq tukzaw, mbu daengz mboq zawh haxnyaeux. ¹³Gaj goanz bin dij Sen naeh daj dix hax: "Saxzazliqyaq, mawz laek mbu, dij Sen haeuz ruxnyinz sowh kauq mawz daj dix hax naeh yaj. Mijmez mawz, Yixliqcazbowh zaekgaj miz goanz lug zaiz ux, mawz saeh dix nyaek minxzwh hoak Yezhanq. ¹⁴Mawz toj faengz taeuq mboqyaq, miz goanz lai taeuq goj cho dix zowngx daeuj ej faengz taeuq. ¹⁵Mwznaj gaenqdix yuq ndaw zaw dij Sen Zaeuj zawh goanz ux, laek hawj dix ndut laeuj paed rux ndut laeuj paet, laeuj gaeng goj mboq hawj dix ndut, zwz dix naengz yuq ndaw

^a1:5 Zwz naeh, puj mbud dij Sen ndaw dix miz ngihsip-siq boangx; paenqdix dungzlwih yuq Rownz dij Sen kvej dij Sen.

^b1:5 Yaqlunh zawh goz Moahciz, gaenqdix zawh dij goanz Yaeuhtaiq puj mbud dij Sen goanz daekgoanq daengzle naeh. Lez ndaw Sw Ni Aizjih 28:1-2.

dongx meh dix naeh Minghkoan dij Sen zoq dumh daengz ndang dix. ¹⁶Gaenqdix hawj dij goanz Yixsowhleh goanz lai taeuq daeuq ueq dauh maz nowngz dij Sen Zaeuj paenqdix. ¹⁷Dix ndaej yaiz Yixliqyaq, ^cndaej doakriangz Yixliqyaq, dix daeq daekgoanq Zaeuj, ‘hawj zaw sowh puj hoak boh naeh ueq maz doq lug,’^d hawj sowh puj mboq biak kauq naeh daeuq biak aen gvai sowh puj gaemz hax mboq miz naeh, goj saeh Zaeuj dox dij goanz.” ¹⁸Saxzazliqyaq cham goanz bin dij Sen naeh: "Gux hoakrawz ruxndeq mbaed saeh naeh rux baenz zaeh mux? Gux haeuz jeq, mijmez gux goj haeuz ndaej to bi." ¹⁹Goanz bin dij Sen naeh yaeng: "Gux zawh Zazbowhleh, goanz daeq haenz dij Sen daeuj naeh, dij Sen nemz gux daeuj daj mawz hax kauq, aeu suq kauqfaengz naeh laemh dwk mawz. ²⁰Taeng zwz maz, suq kauq gux hax naeh baenz zaeh mboqyaq. Gaj mawz mboq sinq kauq gux, hawj mawz mboq rux hax kauq, hawj mbaed saeh naeh baenz yaq, mawz zux rux hax kauq."

²¹Goanzlai yuq baihnog taj Saxzazliqyaq, dix ndowj ndowj naengz mboq og daeuj, daengzle sawz taeuq. ²²Doaklaeng dix og daeuj, mboq rux hax kauq, aeu mungz bij hawj daengzle lez, daengzle zoq ruxndeq dix yuq ndaw rownz dij Sen leztaen sowh gaenq dij Sen hawj dix daj paen'hwnz dungzlumj taen naeh. Daeq vaenznaeh mwz dix zoq mboq rux hax kauq.

²³Saxzazliqyaq kvej mowd jeh laenh zoah boangx dix kvej naeh, dix zoq dauh bae rownz. ²⁴Gvaq ndaej ndauj ux, mez dix Yixliqcazbowh bazlug zaeh. Bazlug yaq, haj ndown daekgoanq yuq gaj ndaw rownz, mboq og nog taen puj ndai. ²⁵Yixliqcazbowhruxndeq dix bazlug yaq, gaenqdix hax: "Zaeuj zauzhuz gux, nwh gux zaehzaeh loh! Koax daekgoanq daenh lez mboq qix gux, gaj gannaeh dix hawj gux yuq doqnaj daengzle ngangh to ndaej!"

Bin Dij Sen Haxdoq Maxliqyaq Yeysuz Zaekgaj Zowngx

²⁶Yixliqcazbowh bazlug taeng ndown daih choak, dij Sen nemz bin dij Sen goanz hoak Zazbowhleh naeh mwz mbanj Zazliqliq longq minxzwh hoak Nazsahlowh naeh, ²⁷mwz lez goanz saureauh ux, goanz saureauh naeh minxzwh dix hoak Maxliqyaq. Ndiq saureauh naeh naengz mboq baenz rownz, goj naengz mboq sanz daj puj zaiz zaemhnoanz gah. Rownz ndiq naeh haeuz yinq aeu dix kai hawj goanz hoak Yeysowh, goanz luglan Laux hongz Daqvaeq naeh.^e ²⁸Goanz bin dij Sen naeh ndonj mwz daj dix hax: "Ndiq nyingz Zaeuj gumx taeuq naeh, mawz yuqndae naeujbojleh! Zaeuj daj mawz zaemh yuq yah." ²⁹Maxliqyaq ruxnyinz gaemz kauq naeh, zoq mbu taeuq, ndaw zaw caqsiq nwh le gaemz kauq naeh zawh hax gaeng. ³⁰Goanz bin dij Sen naeh zoq daj dix hax: "Maxliqyaq, laek mbu, dij Sen yumq

^c1:17 *Yixliqyaq*zawh zwzpujjeq goanz puj zawxkauq dij Sen ux. Lez Sw Laux hongz Bwn Daih Aet Naeh, Sw Laux hongz Bwnz Daih Ngih Naeh.

^d1:17 Gaemz kauq naeh yuq ndaw Sw Maxlazjiz 4:6.

^e1:27 *Daqvaeq*zawh zwzpujjeq laux hongz Yixsowhleh ux.

zaemz mawz yah. ³¹ Mawz zaekgaj bazlug, miz maeng lug zaiz ux, mawz saeh dix nyaek minxzwh hoak Yezsuz. ³² Mwznaj dix hoak goanz dwx, daenh rongx dix hoak: Lug zaiz laux Sen dwx nyeuz daengzle naeh. Zaeuj raeuz Dij Sen hawj dix sup puj jeq rownz dix Daqvaeq hoak hongz. ³³ Dix hoak hongz rownz Yaqgowh,^f hoak daengznauq, goh dix mboq miz zwzmowd."

³⁴ Maxliqyaq daj goanz bin dij Sen naeh hax: "Gaj gaenqgux naengz mboq baenz rownz, naengz mboq sanz daj gawz zaemhnoanz, hoakrawz miz sowh saeh naeh mux?" ³⁵ Goanz bin dij Sen naeh yaeng: "Minghkoan dij Sen daeuj ndaw ndang mawz, doakriangz laux dwx nyeuz daengzle yaz mawz. Baenzaqnaeh goanz sawrik zaekgaj zowngx daeuj naeh rongx hoak lug zaiz dij Sen mboqyaq. ³⁶ Daengz Yixliqcazbowh, goanz bihnongx mawz naeh, daenh hax dix mboq rux zowngx lug, gaj gannaeh dix baenz puj jeq, dix goj baz maeng lug zaiz ux, haeuz ndaej choak ndown. ³⁷ Gux haxdoq mawz, kauq dij Sen mboq miz saek gaemz mboq miz doakriangz, dix gaeng goj hoak ndaej taeng." ³⁸ Maxliqyaq hax: "Gux zawh puj kojij dij Sen, ngwz suq kauq mawz hax naeh yuq ndaw ndang kojij baenz zaeh." Goanz bin dij Sen naeh zoq ni Maxliqyaq mwz.

³⁹ Maxliqyaq zoq cenq mwz longq ux, longq naeh yuq ndaw bo mbanj Yaeuhdaq, ⁴⁰ mwz taeng rownz Saxzazliqyaq, dix ndonj mwz ndaw rownz goakdwk Yixliqcazbowh. ⁴¹ Yixliqcazbowh daeh ruxnyinz hiang Maxliqyaq goakdwk dix, lug dix yuq ndaw dongx dix daeh yoangh, Minghkoan dij

Sen dumh daengz ndang Yixliqcazbowh. ⁴² Dix zoq caqsiq daeh hax: "Puj nyingz raeuz mawz zawh goanz dij Sen gumx nyeuz daengzle naeh, lug ndaw dongx mawz goj zawh venj naeh. ⁴³ Meh Zaeuj gux maz dih gux inxnaeh, sowh saeh naeh naengz rux laenh zoah gux ngah! ⁴⁴ Mawz lez, gux daeh ruxnyinz hiang mawz goakdwk gux, lug gux yuq ndaw dongx zoq faengz, zoq yoangh. ⁴⁵ Mawz sinq suq kauq Zaeuj daj mawz hax naeh rux baenz zaeh, Zaeuj hawj mawz faengz yah."

Maxliqyaq Aeu Zaeuj Hoak Dwax

⁴⁶ Maxliqyaq hax:

"Gux aeu Zaeuj hoak dwx,

⁴⁷ ndaw zaw gux cholaeng dij Sen laux zaeuj jeuq gux naeh ej faengz.

⁴⁸ Gux zawh puj kojij nyingz dij Sen, gux mboq miz gaeng najta, gaj dij Sen naengz doiq gux ndae baenzaqnaeh.

Daeq gannaeh mwz, dij goanz zoh rawz goj leztaen dij Sen gumx gux.

⁴⁹ Dij Sen gaeng goj rux hoak naeh, dix saeh gux hoak gaenq dwx, dix zawh dij Sen dwx nyeuz daengzle!

⁵⁰ Dix nwh sowh dij goanz biangz dix daj mbu dix naeh, zoh dam zoh.

⁵¹ Dix ed qen dix hawj daenh leztaen doakriangz dwx dix, Dix daem sowh puj baegbongz naeh goanz ux banh mwz dih ux.

^f1:33 Rownz Yaqgowh zoq zawh hax: "Luglan Yaqgowh, dij goanz Yixsowhleh."

⁵² Dix hawj puj saeq loangz daeuj,
hawj sowh puj mboq miz najta naeh kwnj.

⁵³ Dix hawj puj yaeg miz gaenq van jin, hawj
paenqdix jin imq,
gaj hawj puj baenzsaq mungz byaeuq dauh
mwz.

⁵⁴ Dix luz puj koj dix puj Yixsowhleh,
zwzzwz gumx paenqdix,

⁵⁵ daj dix ndaej daj puj jeq rownz raeuz hax naeh
dungzlumj:
‘Gux gumx Yaqboahlazhanq daj luglan dix,
taengdiak daengznauq.’”

⁵⁶ Maxliqyaq daj Yixliqcazbowh zaemh ndowj teq
sam ndown ux naeh, zoq dauh daeuj rownz.

Yezhanq Zowngx Daeuj

⁵⁷ Yixliqcazbowh taeng zwzced, zowngx daeuj
maeng lug zaiz ux. ⁵⁸ Sowh dij goanz rownz
dungzzawj naeh daj bihnongx dix ruxndeq Zaeuj
gumx dix baenzzaqnaeh, hawj dix miz maeng
lug naeh, daengzle daj dix zaemh faengz. ⁵⁹ Lug
dix zowngx daeuj yaq, taeng vaenz daih biad,
paenqdix saeh maeng lug naeh hoak diauq zauh
heh naeh. Sowh dij goanz rownz dungzzawj naeh
daj bihnongx dix daz nyaek minxzwh dix hoak daj
minxzwh dez dix dungzlumj, hoak Saxzazliqyaq.
⁶⁰ Gaj Yixliqcazbowh hax: "Mboq baenz, nyaek
minxzwh dix hoak Yezhanq." ⁶¹ Paenqdix daj dix
hax: "Suq boangx bihnongx mawz naeh mboq miz
minxzwh gawz rongx hoak zaq naeh." ⁶² Paenqdix
zoq aeu mungz cham Saxzazliqyaq, cham dix maeng
lug dix rongx hoak gawz. ⁶³ Saxzazliqyaq hawj

daenh aeu kvaix maex ux hawj dix, dix zoq laiz:
"Minxzwh dix zawh Yezhanq." Daengzle sawz
taeuq. ⁶⁴ Sowh gaunaeh Saxzazliqyaq zoq cenq
rux hax kauq, biangz dij Sen. ⁶⁵ Dij goanz rownz
haenzhenz gaj goanz gaj mbu. Doaklaeng le mbaed
saeh naeh zoq leuz bae daengz mbanj Yaeuhdaq
nauq. ⁶⁶ Gawz ruxnyinz, gawz aeu le mbaed saeh
naeh nyaengx zaw, ndaw zaw nwh: "Maeng lug naeh
miz Zaeuj luz dix, mwznaj zawh dij goanz hoak
gaeng nix?"

Saxzazliqyaq Zawx Kauq dij Sen

⁶⁷ Minghkoan dij Sen dumh daengz ndang
Saxzazliqyaq goanz dez Yezhanq naeh,
Saxzazliqyaq zoq zawxkauq dij Sen, hax:

⁶⁸ "Hoj biangz Zaeuj raeuz dij Sen Yixsowhleh,
dix daeuj zauzhuz dij goanz dix, taeq dij
goanz dix dauh maz.

⁶⁹ Daqvaeq goanz puj koj dij Sen naeh,
dij Sen hawj luglan dix goanz ux riangz taeuq,
daeuj jeuq gaenqraeuz.

⁷⁰ Daj zwzpujjeq Zaeuj nemz puj zawxkauq
dix zawx kauq dix dungzlumj.

⁷¹ Zaeuj jeuq gaenqraeuz ni sowh puj daj raeuz
dangqbaih naeh,
jeuq gaenqraeuz ni dawj mungz sowh puj
hwnq gaenqraeuz naeh.

⁷² Dix zwzzwz nwh puj jeq rownz raeuz,
dix nyen ndaej gaenq daj puj jeq rownz raeuz
dungzdingq naeh.

⁷³ Zoq zawh gaenq dix yinq hawj puj jeq rownz
raeuz Yaqboahlazhanq naeh,

^{74–75} Dix jeuq raeuz daeq dawj mungz puj daj
raeuz dangqbaih naeh daeuj,
hawj raeuz mboq mbu gaeng,
hawj raeuz hoak goanz sawrik, hoak
goanz gaemz hax mboq miz,
daengz zoh goanz yuq doqnaj dix kvej
dix.

⁷⁶ Lug gux aj, mawz zoah daenh rongx hoak puj
zawxkauq dij Sen.^g
Unj mwznaj mawz daeq daekgoanq Zaeuj,
sah Zaeuj lauh ka loh dix,

^{77–78} hawj dij goanz dix ruxndeq dij Sen zwzzwz
nwh paenqdix,
dix zoq yangq gaenq hoakloang paenqdix,
jeuq paenqdix.

Dij Sen zwzzwz nwh gaenqraeuz, dix zoq hawj
longznded zangnaw daeq ndaw fax zauq
daeuj ndang raeuz, zauzhuz gaenqraeuz,

⁷⁹ zauq daeuj ndang sowh dij goanz yuq dih
ndaem zumhzumh sowh dij goanz mbu tai
naeh, lingz din raeuz daeq ka loh ndaej
yuqvangq naeh."

⁸⁰ Doaklaeng Yezhanq baenz puj dwx, ndaw
zaw vwnxcih. Dix yuq ndaw doanghmowz ndowj,
ndowj taengdiak vaenz dix yuq doqnaj doqta puj
Yixsowhleh koanx gaenq dij Sen naeh.

Yezsuz Zowngx Daeuj

2 ¹ Jeh Maxliqyaq bazlug naeh, Kaixsax-
auqguxsezduz, laux hongz goh Loahmax,

yaix sowh dij goanz Loahmax gvanx naeh rownz
gawz miz jij goanz goj bae loahfuq. ² Baez naeh
zawh baeznduq loahfuq, jeh naeh Jizlixnyeux hoak
saeq dwx gvanx mbanj Ciqliqyaq naeh. ³ Dangq
goanz dangq dauh bae goakrownz hoakri loahfuq.
⁴ Yezsowh zawh luglan laux hongz Daqvaeq, dix
daeq mbanj Zazliqliq longq Nazsahlowh naeh mwz
mbanj Yaeuhdaq, mwz taeng longq Bozliqhaenh,
longq naeh zawh goakrownz laux hongz Daqvaeq.
⁵ Dix daj Maxliqyaq, goanz bohmech dix mai hawj
dix naeh, dauh mwz goakrownz dix loahfuq.
Zwz naeh Maxliqyaq bazlug. ⁶ Paenqdix mwz
taeng Bozliqhaenh, Maxliqyaq zoq zoah zwzced,
⁷ zowngx maeng lug zaiz to dix daeuj, aeu omj
toq lug dix. Lixcowq longq naeh mboq miz gowh
rawz byaeuq, baenzaqnaeh Maxliqyaq aeu lug dix
nyaengx bae ndaw lowznyaj dij max.

Bin dij Sen Aeu Gaenq Yezsuz

Haxdoq Puj dawzmbej

⁸ Laemh zwz naeh yuq haenzhenz longq
Bozliqhaenh, miz puj dawzmbej zang'hwnz yuq
bairnog ndowj, lez boangx mbej paenqdix. ⁹ Miz
goanz bin dij Sen ux hubhaeb in yuq haenz
paenqdix, haenz paenqdix gaj baih gaj miz ngaeuz
dij Sen zauq daeuj doq, paenqdix zoq mbu taeuq.
¹⁰ Goanz bin dij Sen naeh daj paenqdix hax: "Laek
mbu, gux laemh dwk gaenqsu diauq ux faengz
taeuq, diauq naeh zawh hax hawj daengzle biak.
¹¹ Vaenznaeh, yuq ndaw longq laux hongz Daqvaeq
naeh, zowngx daeuj goanz ux hawj su, goanz naeh

^g1:76 Inxnaeh mbaednduq zawh hoakzaqnaeh hax: *Pujzawxkauq Laux dwx nyeuz daengzle naeh.*

daeuj jeuq dij goanz, dix zoq zawh Jizduz, Zaeuj.^h
¹² Gaenqsu rux leztaen maeng lug eng ux, aeu omj
 toq, noanz ndaw lowznyaj dij max, zoq zawh dix.
 Su leztaen yaq su zoq ruxndeq gaemz kauq gux hax
 naeh zawh zaeh." ¹³ Sowh gau naeh, miz yaengh
 boangx bin dij Sen og daeuj, daj goanz bin dij Sen
 gaengnaeh zaemh biangz dij Sen. Paenqdix hax:

¹⁴ "Yuq ndaw fax, zawh dij Sen dwx nyeuz
 daengzle,
 yuq dihndin, dix hawj sowh dij goanz dix
 zaemz naeh yuqvangq!"

¹⁵ Boangx bin dij Sen ni paenqdix, dauh mwz
 ndaw fax. Boangx dawz mbej naeh goanz lej daj
 goanz hax: "Gaenqraeuz bae longq Bozliqhaenh,
 lez mbaed saeh haeuz baenz yaq naeh, mbaed saeh
 Zaeuj hawj raeuz ruxndeq naeh." ¹⁶ Paenqdix cenq
 bae, cha taen maeng'ex ux noanz ndaw lowznyaj
 dij max; miz Maxliqyaq, Yezsowh daj dix zaemh
 yuq. ¹⁷ Paenqdix leztaen yaq, paenqdix zoq aeu sowh
 saeh bin dij Sen laemh nowto maeng'ex naeh koanx
 dwk daenh. ¹⁸ Gawz ruxnyinz, gawz goj sawz taeuq.
¹⁹ Maxliqyaq aeu mbaed saeh naeh nyaengxzaw,

nwh bae nwh dauh. ²⁰ Boangx dawz mbej naeh, suq
 paenqdix ruxnyinz naeh daj suq paenqdix taen naeh
 gaj yowngh gaj daj gaenq bin dij Sen hax naeh
 dungzlumj, paenqdix zoq dauh mwz, mbaiq dij Sen,
 biangz dij Sen.

²¹ Maeng lug naeh zowngx daeuj yaq, taeng
 vaenz daih biad, zoq saeh maeng naeh hoak diauq
 zauh heh naeh, nyaek minxzwh dix hoak Yezsuz.
 Aen minxzwh naeh zawh zwz Maxliqyaq naengz
 mboq mizndang naeh, bin dij Sen hawj dix nyaek
 hoakzaqnaeh.

Aeu Yezsuz Mwz Mbud Dij Sen

²² Ndauj Maxliqyaq mboq saw gaengnaeh
 mowd yaq, ⁱMaxliqyaq daj Yezsowh hoakzaq
 fahlih Moahciz hax naeh, zowz Yezsuz mwz
 Yezluqsaxlaengx chaenh, aeu dix hawj Zaeuj.
²³ Unj, Fahlih Zaeuj hoakzaqnaeh mai: "Lug zaiz
 nduq mawz, aeu dix hawj Zaeuj, hoak gaenq
 Zaeuj." ^j ²⁴ Fahlih Zaeuj goj hoakzaqnaeh hax: "Aeu
 doiq noagchomj ux rux aeu doiq noagbiadhaeb ux
 mbud Zaeuj."* Baenzzaqnaeh paenqdix goj daz
 mwz hoak diauq naeh.

^{h2:11} *Jizduz*zawh hax: "Goanz zoah aeu yuz maeghit zoaj ndaw to naeh." Zwzndowj, dij Sen lowg puj Yixsowhleh goanz rawz
 hoak puj mbud dix, raj lowg goanz rawz hoak hongz puj Yixsowhleh, dix nemz puj Yixsowhleh aeu yuz maeghit zoaj ndaw to
 sowh goanz dix lowg naeh. Dij Sen tungzgoaq puj zawxkauq dix yinq dij goanz dix, yinq hawj paenqdix goanz Jizduz ux, hawj
 goanz Jizduz naeh daeuj dihndin jeuq dij goanz daj gvanx dij goanz.

^{i2:22} *Moahciz*zawh zwzpujjeq goanz puj zawxkauq dij Sen ux. Dij Sen hawj dix mai fahlih dij Sen, aeu sowh fahlih naeh zau
 puj Yixsowhleh. Dix mai haj bwnz sw, miz bwnz ux minxzwh rongx hoak Sw Liqvaeq. Ndaw Sw Liqvaeq 12:1-8, puj nyingz
 zowngx lug yaq, zawh mboq saw. Jixzawh zowngx daeuj zawh lug zaiz, vaenz daih biad, saeh lug eng hoak diauq zauh heh naeh,
 yaq daeuq gvaq samsip-sam vaenz, ndaw ndang mboq miz lowd daeuj, zux suanq zawh saw.

^{j2:23} Gaemz kauq naeh haeuz yuq ndaw Sw Ni Aizjih 13:2.

*^{2:24} Liqvaeq 12:8.

²⁵ Paenqdix mwz taeng Yezluqsaxlaengx, Yezluqsaxlaengx miz laux ux minxzwh rongx hoak Cizmaenh, goanz naeh gaemz hax mboq miz, ruxndeq mbu dij Sen. Dix gaj zwz gaj ngwz goanz daeuj byongz dij goanz Yixsowhleleh naeh daeuj. Miz Minghkoan dij Sen daj dix zaemh yuq. ²⁶ Minghkoan dij Sen aj hawj dix ruxndeq zwz dix naengz mboq tai naeh hawj dix ndaej taen Jizduz, goanz Zaeuj nemz daeuj naeh. ²⁷ Vaenz gaengnaeh, Minghkoan dij Sen hawj dix mwz rownz dij Sen. Dix yuq gumhhongh rownz dij Sen leztaen Yezsowh daj Maxliqyaq umj Yezsuz ndonj maz, hoak sowh gaeng fahlh Moahciz hax naeh. ²⁸ Cizmyenx umj maeng lug naeh maz ndaw mungz dix, dix biangz dij Sen hax:

²⁹ "Zaeuj gux aj, kauq mawz haeuz baenz zaeh, mawz hawj koj tai vangqdangh ej.

³⁰ Unj gux haeuz haeggaj ndaej ta taen goanz mawz aeu daeuj jeuq dij goanz naeh.

³¹ Mawz yuq doqnaj dij goanz dawj fax lowg dix, aeu dix nyaengxtaj daeuj jeuq dij goanz.

³² Zaeuj gux aj, goanz mawz nemz daeuj naeh zawh hawj dij goanz mawz, dij goanz Yixsowhleleh miz najta, dix zawh aen daeng yangz daj lingz puj yowngh ndai naeh."

³³ Bohmeh Yezsuz ruxnyinz Cizmyenx hax sowh kauq laemh nowto lug paenqdix naeh, daengz

song goanz sawz taeuq. ³⁴ Cizmaenh vanz dij Sen gumx paenqdix. Vanz yaq, dix daj Maxliqyaq, meh maeng naeh, hax: "Dij Sen lowg maeng naeh, hawj puj Yixsowhleleh goanz lai taeuq cho dix laemx, hawj goanz lai taeuq cho dix dwnq, hawj dix hoak goanz zoah goanzlai taeuq moakndai naeh. ³⁵ Hoakzaqnaeh, zoq ruxndeq zaw dij goanz nwh gaeng. Mwznaj zaw mawz goj chaej daj aeu remz mboangq dungzlumj."

³⁶ Naengz miz yah puj zawxkauq dij Sen ux, minxzwh rongx hoak Yaqnah. Yaqnah zawh luglan Yaqsohw, dix zawh lug nyingz Fahnoiqliq, gannaeh haeuz baenz puj jeq. Zwz dix baenz saureauh naeh, dix kai hawj po dix, dix baenzrownz yaq, daj po dix zaemh yuq ndaej jiat bi, po dix zoq mboq miz. ³⁷ Po dix mboq miz yaq dix zoq baenz mehmaiij, gannaeh dix ndaej biadsip-siq bi. Dix mboq sanz ni rownz dij Sen vaenz rawz, vaenzlinzhwnz kvej dij Sen, dix jenjkaeuj hoakri daj dij Sen hax kauq. ³⁸ Gaunaeh dix goj yuq haenz maeng naeh biangz dij Sen, daj sowh dij goanz ngwz Yezluqsaxlaengx ndaej jeuq naeh laemh saeh nowto maeng lug naeh.

³⁹ Yezsowh daj Maxliqyaq hoak nauq sowh saeh fahlh Zaeuj yaix hoak naeh, dauh bae ndaw mbanj Zazliqliq, bae longq paenqdix Nazsahlowh naeh. ⁴⁰ Daeklaeng maeng lug naeh gaj ndowj gaj baenz pujdwx, miz doakriangz, miz aen gvai, dij Sen gumx dix.

Maeng Yeysuz Naeh Mwz Ndaw

Yecluqsaxlaengx Jin Jeng

⁴¹ Jeng Gvaq,^k bohmech Yeysuz gaj bi gaj mwz Yecluqsaxlaengx. ⁴² Bi Yeysuz ndaej sipngih bi naeh, paenqdix goj hoakzaq zauh gaem Jeng naeh mwz Yecluqsaxlaengx. ⁴³ Gvaq Jeng Gvaq yaq, bohmech Yeysuz dauh bae rownz, maeng Yeysuz naeh naengz yuq ndaw Yecluqsaxlaengx, gaj bohmech dix mboq ruxndeq. ⁴⁴ Paenqdix faeklah dix yuq jeh sowh puj zaemh daeq naeh. Daeq yaengh vaenz, zux bae cham sowh bihnongx daj puj dungz ruxnaj zaemh daeq Yecluqsaxlaengx dauh daeuj naeh, cham paenqdix taen Yeysuz mbaeuq. ⁴⁵ Paenqdix cha mboq taen dix, zoq daeuq dauh mwz Yecluqsaxlaengx cha dix. ⁴⁶ Gvaq ndaej sam vaenz, zux taen dix yuq ndaw rownz dij Sen, dix daj lauxswz zaemh yuq, menq biak menq cham. ⁴⁷ Nanghgaj sowh dij goanz ruxnyinz dix goak naeh, gaj goanz gaj sawz, mboq naemz dix miz aen gvai daj rux yaeng baenz naeh. ⁴⁸ Bohmech dix leztaen goj sawz taeuq, meh dix hax: "Lug zaiz gux aj, mawz baenzrawz daj piu hoakzaqnaeh hoak mux? Dez mawz daj gux dij taeuq, bae dih bae dih cha mawz!" ⁴⁹ Yeysuz hax: "Gaenqsu baenzrawz cha gux mux? Gaenqsu mboq ruxndeq gux yuq rownz dez gux zux baenz mah?" ⁵⁰ Gaj paenqdix mboq ruxndeq

gaemz dix yaeng naeh zawh hax gaeng. ⁵¹ Yeysuz daj bohmech dix dauh bae longq Nazsahlowh, gaeng goj biakkauq bohmech dix. Gaj meh dix aeu mbaed saeh naeh nyaengxzaw.

⁵² Yeysuz gaj ndowj gaj maj sung, gaj ndowj gaj miz aen gvai. Dij Sen daj dij goanz gaj ndowj gaj zaemz dix, cho dix faengz.

Yezhanq Goanz Saeh Daenh

Hoak Diauq Zauh Soiq Naeh

3 ¹⁻² Bi Tihpihleuh hoak laux hongz goh Loahmax bi ndaej siphaj bi naeh, Yezhanq goanz lug zaiz Saxzazliqyaq naeh yuq ndaw doanghmowz, dij Sen daj dix hax kauq. Laemh bi naeh, Baenxdeuz-bihlazdoz hoak saeq dwx gvanx mbanj Yaeuhdaq, Cizlih yuq ndaw mbanj Zazliqliq hoak hongz, Faezliq goanz nongx zaiz Cizlih naeh yuq ndaw mbanj Yixtuxliqyaq daj ndaw mbanj Towhlazkoaxnih hoak hongz, Loixsaxnihyaq yuq ndaw mbanj Yaqbixliqnih hoak hongz, Yaqnah daj Gaizyaqfah hoak puj mbud dij Sen goanz saeq dwx nyeuz daengzle naeh. ³ Dij Sen daj Yezhanq hax kauq yaq, Yezhanq zoq maz daengz mbanj haenzhenz ka dah Yezdanq naeh zawx kauq dij Sen, dix koanx dwk daenh: "Ndaw zaw gaenqsu yauq rux gaix, gux zoq saeh gaenqsu hoak diauq zauh soiq naeh,¹ hoakzaqnaeh vanz dij Sen yangq

^k2:41 *Jeng Gvaq* zawh puj Yaeuhtaiq bi ux jin gonghhw ux hoak gaenq nyen zwzpujjeq dij Sen zowz paenqdix ni ndaw Aizjih. Gaj laux hongz Aizjih mboq hawj paenqdix ni, dij Sen nemz bin dix ux daeuj kaj lug zaiz to sowh dij goanz yuq ndaw Aizjih naeh. Gaj jixzawh baegdu rownz gawz miz lowd dij mbej ix, bin dij Sen zoq gvaq bae, mboq mwz ndaw rownz, kaj lug zaiz to. Hoakzaqnaeh zoq rongx hoak "*Jeng Gvaq*."

¹3:3 *Hoak diauq zauh soiq naeh* zoq zawh hax aeu naemx soiq ndang. Yezhanq aeu naemx saeh sowh puj ndaw zaw gaix naeh hoak diauq zauh soiq naeh, vanz dij Sen yangq gaenq hoakloang paenqdix, hoakzaqnaeh daj aeu naemx saeh paenqdix soiq ndang dungz lumj.

gaenq gaenqsu hoak loang naeh." ⁴Daj le gaemz Yixsaiqyaq goanz puj zawxkauq dij Sen mai ndaw sw naeh dungzlumj, ndaw sw dix, dix hoakzaqnaeh mai:

"Mwznaj miz hiang dij goanz yuq ndaw doanghmowz hoakzaqnaeh rongx:

'SaeH Zaeuj raeuz lauh ka loh dix;

Diq swH ka loh mbaedmawq dix daeq naeh!'^m

⁵Mwznaj, ndoang ndaek ndoang pyenj goj zoah teanh nauq,

Bo dwx bo ix goj zoah mbaeg piang nauq!

SowH ka loh koa naeh diq dix swH,

SowH ka loh mboakmbwngq naeh diq dix piang!ⁿ

⁶Mwznaj dij goanz gaj goanz gaj ruxndeq dij Sen haeuz daeuj jeuq dij goanz yah."

⁷Yezhanq daj sowH puj daz maz hawj dix saeh hoak diauq zauh soiq naeh hax: "Su zawH sowH luglan dij nguz miz duh naeh, gaenqsu faeklah gaenqsu rux gowx gvaq dij Sen rikdwk chaenxfah maj? ⁸JixzawH ndaw zaw gaenqsu gaix zaeh, gaenqsu zoq hoak saeh ndae og maz, hawj daj zaw haeuz gaix naeh dungzkaeuj. Gaenqsu faeklah gaenqsu zawH luglan Yaqboahlazhanq dij Sen ej mboq chaenxfah gaenqsu mawH! Gux haxdoq su, daengz sowH tin naeh dij Sen goj rux aeu byenqbaenz luglan Yaqboahlazhanq. ⁹Gannaeh kvan haeuz aeu nyaengx now laegmaex yaj, sowH

go maeg rawz maeg dix mboq ndae zoq zoah taemj, viangh bae ndaw faez."

¹⁰Miz dij goanz cham dix: "Haenx, gaenqpiu hoj hoakzaqrawz hoak mux?" ¹¹Yezhanq yaeng: "Gawz miz song gongzsowj, gawz zoq hoj aeu baen sowH goanz mboq miz naeh, gaenqjin gojvenj." ¹²SowH puj caeu coi q naeh goj maz hawj dix saeh hoak diauq zauh soiq naeh, paenqdix cham Yezhanq: "Lauxswz, gaenqpiu hoj hoakrawz hoak mux?" ¹³Yezhanq yaeng: "Hoj caeu gajrawz zoq caeu gajrawz, mboq jinx do caeu." ¹⁴Bin cham Yezhanq: "Gaenqpiu nix, gaenqpiu hoj hoakzaqrawz hoak mux?" Yezhanq yaeng: "Mboq jinx longx jenz daenh, mboq jinx moakndai daenh, sowH gaenqsu ndaej naeh baenz laemjzaw yah."

¹⁵Zwz naeh, puj YixsowhleH taj Jizduz daeuj, ndaw zaw daengzle am, hax Yezhanq ingj rux zawH Jizduz. ¹⁶Yezhanq daj goanzlai hax: "Gux aeu naemx saeh su hoak diauq zauh soiq naeh, gaj goanz daeuj doaklaeng gux naeh, riangz nyeuz gux lai, haen nyeuz gux lai. Gux daengz saeh dix hih sai haiz naengz mboq paeq. Dix aeu Minghkoan dij Sen daj faez saeh su hoak diauq zauh soiq naeh. ¹⁷Mungz dix gaem aen chaeng, chaeng kaeujmeg saw, aeu kaeujmeg mwz nyaengx ndaw riangxkaeuj dix, gaj raemz, dix aeu sowH faez maej mboq rux ndaep daengznauq naeh pyaeu nauq." ¹⁸Yezhanq aeu lai yowngh taeuq saengq goanzlai, byongz paenqdix, aeu kauqfaengz dij Sen koanx dwk paenqdix.

¹⁹Cizlih laux hongz gvanx ndaw mbanj Zazliqliq naeh, dix raep Cizloahdix yah mez nongx zaiz dix

^m3:4 Inxnaeh mboq zawH hax lauh ka loh zaeh, zawH hax yaix dij goanz yinq gaenq hoakloang paenqdix, nwh kauq dij Sen.

ⁿ3:5 Suq kauq naeh haeuz yuq Sw Yixsaiqyaq 40:3-5.

naeh. Dix goj hoak saeh raix lai taeuq. Cho sowh naeh, dix zoah Yezhanq hwt. ²⁰Doaklaeng, Cizlih daeuq hoak mbaed saeh raix ux, zoq zawh dix aeu Yezhanq mwz kaeng ndaw lauz.

**Yeysuz Hawj Yezhanq Saeh
Dix Hoak Diauq Zauh Soiq Naeh**

²¹Ndauj Yezhanq yuq ka dah Yezdanq saeh goanzlai hoak diauq zauh soiq naeh naeh, Yeysuz goj maz hoak diauq zauh soiq naeh. Gau Yeysuz daj dij Sen hax kauq naeh, fax zoq aj, ²²Minghkoan dij Sen daj noagbiadhaeb dungzlumj loangz daeuj ndaw ndang dix. Yaq daeuq miz hiangkauq daeq ndaw fax loangz daeuj, hax: "Mawz zawh lug zaiz gux, gux ngaiq mawz, zaemz mawz taeuq."

Puj jeq Rownz Yeysuz

²³Zwz Yeysuz hiamq aeu kauq dij Sen koanx dwk daenh naeh, dix ndaej teq samsip bi ux naeh. Daenh faeklah dix zawh lug zaiz Yeysowh. Goanz Yeysowh naeh zawh lug zaiz Cizlix. ²⁴Cizlix zawh lug zaiz Maxdah, Maxdah zawh lug zaiz Liqvaeq, Liqvaeq zawh lug zaiz Mowhjiz, Mowhjiz zawh lug zaiz Yaqnah, Yaqnah zawh lug zaiz Yeysowh. ²⁵Yeysowh zawh lug zaiz Maxtaztihyaq, Maxtaztihyaq zawh lug zaiz Yaqmoahciz, Yaqmoahciz zawh lug zaiz Nahhungh, Nahhungh zawh lug zaiz Yixsezliq, Yixsezliq zawh lug zaiz Nahgaiz, ²⁶Nahgaiz zawh lug zaiz Maxyah, Maxyah zawh lug zaiz Maxtaztihyaq, Maxtaztihyaq zawh lug zaiz Cizmaex, Cizmaex zawh lug zaiz Yeysowh, Yeysowh zawh lug zaiz Yaeuhdaq, ²⁷Yaeuhdaq zawh lug zaiz

Yezyaqnah, Yezyaqnah zawh lug zaiz Liqsax, Liqsax zawh lug zaiz Soxlohbazboh, Soxlohbazboh zawh lug zaiz Saxlazteh, Saxlazteh zawh lug zaiz Nihliq, Nihliq zawh lug zaiz Mowhjiz, ²⁸Mowhjiz zawh lug zaiz Yaqdix, Yaqdix zawh lug zaiz Goazsangz, Goazsangz zawh lug zaiz Yixmoahdangz, Yixmoahdangz zawh lug zaiz Ex, ²⁹Ex zawh lug zaiz Yeysuz, Yeysuz zawh lug zaiz Yixliqyixceq, Yixliqyixceq zawh lug zaiz Yezlinq, Yezlinq zawh lug zaiz Maxdah, Maxdah zawh lug zaiz Liqvaeq, ³⁰Liqvaeq zawh lug zaiz Cizmyenx, Cizmyenx zawh lug zaiz Yaeuhdaq, Yaeuhdaq zawh lug zaiz Yeysowh, Yeysowh zawh lug zaiz Yeznanh, Yeznanh zawh lug zaiz Yixliqyaqjinq, ³¹Yixliqyaqjinq zawh lug zaiz Mixliqyaq, Mixliqyaq zawh lug zaiz Maixnanh, Maixnanh zawh lug zaiz Maxdahtaz, Maxdahtaz zawh lug zaiz Nahdanz, Nahdanz zawh lug zaiz Daqvaeq, ³²Daqvaeq zawh lug zaiz Yezciz, Yezciz zawh lug zaiz Owmbaeqdowh, Owmbaeqdowh zawh lug zaiz Boz'azswz, Boz'azswz zawh lug zaiz Saxmaenh, Saxmaenh zawh lug zaiz Nahcunq, ³³Nahcunq zawh lug zaiz Yaqmixnahdah, Yaqmixnahdah zawh lug zaiz Yaqdangzminh, Yaqdangzminh zawh lug zaiz Yaqlanh, Yaqlanh zawh lug zaiz Cizswzlunh, Cizswzlunh zawh lug zaiz Fahlowhswz, Fahlowhswz zawh lug zaiz Yaeuhdaq, ³⁴Yaeuhdaq zawh lug zaiz Yaqgowh, Yaqgowh zawh lug zaiz Yitsaeg, Yitsaeg zawh lug zaiz Yaqboahlazhanq, Yaqboahlazhanq zawh lug zaiz Tazlaz, Tazlaz zawh lug zaiz Nahhowh, ³⁵Nahhowh zawh lug zaiz Cizluh, Cizluh zawh lug zaiz Lazvuh, Lazvuh zawh lug zaiz Fahlowh,

Fahlowh zawh lug zaiz Cizboh, Cizboh zawh lug zaiz Sowqlaz, ³⁶ Sowqlaz zawh lug zaiz Gaiznanh, Gaiznanh zawh lug zaiz Yaqfahsax, Yaqfahsax zawh lug zaiz Sanx, Sanx zawh lug zaiz Noahyaq, Noahyaq zawh lug zaiz Lazmowh, ³⁷ Lazmowh zawh lug zaiz Maxtuxsaxlaz, Maxtuxsaxlaz zawh lug zaiz Yixnoah, Yixnoah zawh lug zaiz Yaqleh, Yaqleh zawh lug zaiz Maxlowhle, Maxlowhle zawh lug zaiz Gaiznanh, Gaiznanh zawh lug zaiz Yixnoahsowq, ³⁸ Yixnoahsowq zawh lug zaiz Saiqtowh, Saiqtowh zawh lug zaiz Yaqdangz, Yaqdangz zawh lug dij Sen.

Do Gvanx Dij Pi Naeh Daz

Coak Yeysuz Hoakloang

4 ¹ Minghkoan dij Sen dumh daengz ndang Yeysuz, Yeysuz daeq ndaw dah Yezdanq dauh maz. Minghkoan dij Sen lingz dix bae ndaw doanghmowz ² siqsip vaenz, do gvanx dij pi naeh coak dix daz hawj dix hoak loang. Siqsip vaenz gaengnaeh, Yeysuz gaeng goj mboq jin, le vaenz doaklaeng naeh, dix zoq dongxyaeg. ³ Do gvanx dij pi naeh daj dix hax: "Jixzawh mawz zawh lug zaiz dij Sen, zoq nemz kvaix tin naeh byenqbaenz gaenqjin ndeh!" ⁴ Yeysuz yaeng: "Ndaw *Sw Dij Sen* hoakzaqnaeh hax: 'Dij goanz zaeu mboq zawh kauq gaj gaenqjin.'" ^o

⁵ Do gvanx dij pi naeh zowz dix mwz dih sung, mbaed yaep ta ux zoq jix daengzle goh dawjfax

hawj dix lez nauq. ⁶ Dix daj Yeysuz hax: "Dix daj Yeysuz hax: "Sowh qenhliq dawjfax naeh, gaeng yawz gaeng ndae dawj fax naeh, gux goj aeu hawj mawz nauq, unj, sowh gaeng naeh haeuz bwnz aeu hawj gux yaq, gux ngaiq aeu hawj gawz gux zoq aeu hawj gawz. ⁷ Nanghgaj mawz gvih gux, aeu gux hoak dij sen mawz, daengzle zawh gaeng mawz nauq." ⁸ Yeysuz yaeng: "Ndaw *Sw Dij Sen* hoakzaqnaeh hax:

"'Hoj gvih Zaeuj dij Sen mawz, aeu gaj dix hoak dij Sen mawz, hoj kvej gaj dix.'" ^{*}

⁹ Do gvanx dij pi naeh daeuq zowz Yeysuz mwz taeng Yezluqsaxlaengx, yaix Yeysuz in yuq nyiangzrownz dij Sen, daj Yeysuz hax: "Jixzawh mawz zawh lug zaiz dij Sen, zoq daeq inxnaeh yoangh bae ndeh! ¹⁰ Unj, ndaw *Sw Dij Sen* hoakzaqnaeh hax:

"'Dij Sen nemz bin dix daeuj dawz mawz, hawj mawz baenz rawz mboq ndaej.

¹¹ Bin dix aeu mungz luz mawz, yaj mawz sitndit.'"^p

¹² Yeysuz yaeng: "Ndaw *Sw Dij Sen* hoakzaqnaeh hax: 'Mboq jinx daeg Zaeuj, dij Sen mawz.'" ^q ¹³ Do

^o4:4 Gaemz kauq naeh haeuz yuq Sw Fahlih Daih Ngih 8:3.

^p4:11 Gaemz kauq naeh haeuz yuq Sw Lownx 91:11-12.

^q4:12 Gaemz kauq naeh haeuz yuq Sw Fahlih Daih Ngih 6:16.

^{*}4:8 Fahlih Ngih 6:13.

gvanx dij pi naeh coak Yezsuz yowngh rawz goj mbaeuq, coak nauq dix zoq ni Yezsuz goanq.

Yezsuz Yuq Ndaw Mbanj Zazliqliq

Aeu Kauqfaengz Koanx Dwk Daenh

¹⁴ Yezsuz dauh maz taeng mbanj Zazliqliq, Minghkoan dij Sen haeuz hawj dix miz doakriangz. Zwh Yezsuz leuz bae daengz mbanj naeh nauq.

¹⁵ Dix yuq rownzndawcowq zau daenh, daengzle haenh dix.

Dij Goanz Goakrownz Yezsuz

Mboq Zaemz Yezsuz

¹⁶ Yezsuz maz taeng longq Nazsahlowh, dih hoakri dix dwx naeh, hoakzaq zwzndai naeh, Vaenz Cednoiq mwz rownzndawcowq, in doag *Sw Dij Sen*.^r

¹⁷ Miz goanz ux aeu bwnz sw Yixsaiqyaq goanz puj zawxkauq dij Sen naeh yenh hawj dix. Dix aj sw, fan mwz taeng dih ux, ndaw sw hoakzaqnaeh laiz:

¹⁸ "Dij Sen lowg gux hoak Jizduz;

Minghkoan dij Sen yuq ndang gux.

Dij Sen lowg gux,

hawj gux aeu kauqfaengz dix bae koanx dwk
puj baenzluk,

hawj gux bae haxdoq sowh puj zoah puk mwz
naeh ndaej zoangq daeuj,

hawj gux bae haxdoq sowh puj ta'mbud naeh
daeuj ndaej taen,

hawj sowh puj zoah daenh vazkuz naeh daeuj
ndaej yuqndae,

¹⁹ hawj gux haxdoq daenh:

‘Taeng jeh Zaeuj daeuj jeuj dij goanz naeh
yah.’^s

²⁰ Yezsuz aeu sw jip ndae, yenh hawj sowh goanz
zauzhuz sw naeh, zoq naengh daeuj. Sowh dij goanz

yuq rownzndawcowq naeh gaj goanz gaj lez mwz
doq dix, zawx ruxndeq dix daz hax gaeng. ²¹ Dix daj

paenqdix hax: "Suq kauq ndaw *Sw Dij Sen* inxnaeh,
vaenznaeh haeuz yuq doqnaj su baenz zaeh."

²² Daengzle haenh dix, goj sawz taeuq, mboqnaemz
dix hax ndaej yawz baenzzaqnaeh, zoq hax: "Dix

zawh lug zaiz Yezsowh naeujmax!" ²³ Yezsuz hax:

"Gaenqsu aeu gaemz kauq zwzpujjeq naeh hax gux
mboqyaq, gaemz kauq zwzpujjeq hax: ‘Pujyachaej,

haeggaj ya hoakri mawz ndae ndeh!’ Su goj rux
hoakzaqnaeh hax mboqyaq: ‘Piu ruxnyinz suq saeh

mawz yuq longq Zazbowhnungh hoak naeh, mawz
goj yuq goakrownz mawz inxnaeh hoak mah!’"

²⁴ Yezsuz daeuj hax: "Gux haxdoq su swhlit, puj
zawxkauq dij Sen, gawz goj venj, yuq goakrownz

hoakri mboq miz gawz zaemz goah. ²⁵ Gux laemh
swh dwk su, jeh Yixliqyaq naeh, miz sam bi laeng

choak ndown dungzdam paen mboq daeuj, gaj dih
gaj yaeg, zwz naeh, mehrownz Yixsowhle, sowh

yah po haeuz tai yaq naeh miz lai taeuq. ²⁶ Gaj
dij Sen mboq yaix dix maz saeh paenqdix, yaix

dix bae ndaw mbanj Cizdunq longq Saxlowhfah

^r4:16 Dij goanz Yaeuhtaiq jiat vaenz miz vaenz ux rongx hoak vaenz cednoiq, zoq zawh vaenz daih jiat. Lez Sw Zwz nduq2:2.

^s4:19 Suq kauq naeh haeuz yuq Sw Yixsaiqyaq 61:1-2, 58:6.

naeh saeh yah mehrownz ux, po dix tai yaq naeh.^t
²⁷ Jeh Yixliqsaz naeh, yuq ndaw Yixsowhleh miz dij
 goanz baenznux lai taeuq, gaj dij Sen mboq yaix
 Yixliqsaz ya paenqdix goanz rawz, yaix dix ya gaj
 Naixmanq goanz puj Ciqliqyaq naeh.^u ²⁸ Sowh puj
 yuq rownzndawcowq naeh ruxnyinz le gaemz kauq
 naeh, daengzle jih daengz mboq zawh haxnyaeux.
²⁹ Daengzle dwnq maz, daem dix ni ndaw longq.
 Laemh longq naeh daengj yuq ndaw bo. Paenqdix
 laeg dix bae now ndanq, daz ngex dix doak. ³⁰ Gaj
 Yeysuz gvaq jinghzang paenqdix bae, ni dih naeh.

Yeysuz Yuq Ndaw Zazbowhnungh Daem Dij Pi

³¹ Yeysuz bae taeng mbanj Zazliqliq longq
 Zazbowhnungh naeh, Vaenz Cednoiq naeh dix zau
 daenh. ³² Daenh biak sowh gaenq dix zau naeh
 zoq sawz taeuq, unj kauq dix miz qenhliq taeuq.
³³ Rownzndawcowq miz goanz ux zoah dij pi
 mwz ndang, caqsiq rongx: ³⁴ "Aih, Yeysuz ndaw
 Nazsahlowh, mawz baenzaqrawz daet piu? Mawz
 daz ndaep piu max? Gux ruxndeq mawz zawh
 gawz, mawz zawh goanz sawrik, goanz dij Sen
 lowg daeuj naeh!" ³⁵ Yeysuz hwt dix: "Mbaet baeg!
 Daeq ndaw ndang goanz naeh og daeuj!" Dij pi yuq
 doqnaj daengzle hawj goanz gaengnaeh laemx bae
 dihndin, zoq daeq ndaw ndang goanz naeh og daeuj,
 mboq hawj goanz naeh ijrawz chaej. ³⁶ Daengzle
 sawz taeuq, goanz lej daj goanz hax: "Gaenqnaeh

zawh gaeng saeh mux? Dix miz qenhliq miz
 doakriangz nemz dij pi, dij pi zoq og daeuj ngah!"
³⁷ Yaq zwh Yeysuz zoq leuz bae daengz mbanj naeh
 nauq.

Yeysuz Ya Pujchaej

³⁸ Yeysuz dwnq ni rownzndawcowq, mwz rownz
 Cizmaenh. Yah daiq Cizmaenh nowxndaed taeuq,^v
 paenqdix vanz Yeysuz ya dix. ³⁹ Yeysuz in haenz
 dix, hwt aen chaej nowxndaed naeh, nowx zoq
 zumx. Yah naeh zoq dwnq maz kvej hawj paenqdix.
⁴⁰ Sowh gau tang'vaenz doak naeh, puj chaej gaeng
 goj venj, rownz paenqdix zowz paenqdix maz
 dih Yeysuz naeh.^w Yeysuz aeu mungz baed ndang
 paenqdix, ya paenqdix ndae. ⁴¹ Goj miz dij pi daeq
 ndaw ndang lai goanz taeuq daeuj, dij pi rongx:
 "Mawz zawh lug zaiz dij Sen." Dij pi ruxndeq
 Yeysuz zawh Jizduz, Yeysuz hwt paenqdix, mboq
 hawj paenqdix hax kauq.

Yeysuz Bae Longq Ndai Aeu Kauqfaengz Koanx Dwk Daenh

⁴² Fax rungh, Yeysuz og bae, daeq bae taeng ndaw
 doanghmowz. Daengzle cha dix, cha mex dix, daz
 lanx dix yuq, mboq hawj dix ni paenqdix. ⁴³ Gaj
 Yeysuz hax: "Dij Sen nemz gux daeuj dihndin, zawh
 hawj gux aeu sowh saeh goh dij Sen naeh koanx dwk
 daenh,^x gux bae longq ndai aeu sowh kauqfaengz

^t4:26 Inxnaeh haeuz yuq Sw Laux hongz Bwnz Daih Aet 17:7-24.

^u4:27 Inxnaeh haeuz yuq Sw Laux hongz Bwnz Daih Ngih 5:8-14.

^v4:38 Inxnaeh hax daiq Cizmaenh, zawh hax daiq oanq dix, zoq zawh meh mijmez dix.

^w4:40 Puj Yaeuhtaiq tang'vaenz doak zoq zawh vaengz laeng. Fahlih puj Yaeuhtaiq Vaenz Cednoiq mboq hawj daeq loh.

^x4:43 *Goh dij Sen* zoq zawh hax dij Sen haeggaj daeuj gvanx dij goanz dix, gvanx daengzle sowh gaenq dix chauq naeh.

naeh koanx dwk daenh zuxbaenz." ⁴⁴ Yaq Yezsuz bae rownzndawcowq puj Yaeuhtaiq bae hoak aen hoak aen, aeu sowh saeh goh dij Sen naeh koanx dwk daenh.

Yezsuz Rongx Jijgaj Goanz Cohsaenz

5 ¹ Miz mbaed ux, Yezsuz in yuq haenz kow Gowhnihsaxlowh^y, daenh nyenj maz haenz dix, biak dix laemh kauqfaengz dij Sen. ² Dix leztaen miz song aen lowz yuq haenz kow ced, puj dwkbya ni aen lowz bae sauz mowngx. ³ Miz aen ux zawh aen Cizmaenh, dix zoq kwnj mwz, dix hawj Cizmaenh uaij aen lowz ni dihliangx bae ixux. Yezsuz zoq naengh daeuj, yuq ndaw lowz zau daeuj doq daenh. ⁴ Dix zau gah, zoq daj Cizmaenh hax: "Uaij lowz mawz bae dih naemx ndaek, yaq gaenqsu sauq mowngx dwkbya." ⁵ Cizmaenh hax: "Lauxswz aj, gaenqpiu kux yaengh hwnz, gaeng goj dwk mboq ndaej, gaj gux venq biakkauq mawz sauq mowngx dwkbya." ⁶ Paenqdix zoq sauq mowngx dwkbya, dwk ndaej dij bya lai taeuq, daengz mowngx zaekgaj kaed saw. ⁷ Paenqdix zoq mungzvaed rongx dungzbowh aen lowz ndai maz saeh. Paenqdix maz yaq, zoq aeu dij bya laep daengz song aen lowz daem nauq, daengz lowz zaekgaj zaem saw. ⁸ Cizmaenh, goanz goj rongx hoak Bihdowh naeh, leztaen suq saeh naeh, zoq gvih bae doqnaj Yezsuz, daj Yezsuz hax: "Zaeuj aj, gux zawh puj hoak loang, vanz mawz ni gux ndeh." ⁹ Cizmaenh-bihdowh daj

sowh puj daj dix zaemh yuq naeh, taen aen mowngx naeh dwk ndaej dij bya lai baenzzaqnaeh, gaj goanz gaj sawz taeuq. ¹⁰ Dungzbowh Cizmaenh, doiq lug zaiz Cizpihtaiq: Yaqgowh daj Yezhanq goj zaemh sawz taeuq. Yezsuz daj Cizmaenh hax: "Laek mbu! Daeq vaenz naeh mwz, mawz ndaej dij goanz yah."

¹¹ Paenqdix aeu daengz song aen lowz maz dihliangx yaq, zoq jizzaz daengzle nauq, nowngx Yezsuz, hoak cohsaenz Yezsuz.

Yezsuz Ya Pujchaej Ndae

¹² Miz mbaed ux, Yezsuz yuq longq ux, miz goanz daengz ndang baenznux ux leztaen dix, gvih bae dihndin, vanz dix: "Zaeuj aj! Jixzawh mawz venq, mawz rux hawj koj ndae, rux hawj koj sawrik mboqyaq." ¹³ Yezsuz ed mungz bae baed dix, hax: "Gux venq, mawz sawrik ndeh!" Nux ndaw ndang goanz naeh cenq ni dix, dix zoq ndae, zoq sawrik. ¹⁴ Yezsuz saengq dix mboq hawj dix haxdoq gawz, daeuq daj dix hax: "Mawz cenq mwz hawj puj mbud dij Sen saeh mawz lez, yaq hoak zaq sowh gaeng Moahciz hax naeh aeu doihdo mwz mbud dij Sen,^z hawj daenh ruxndeq nux mawz haeuz ndae yaq."

Yezsuz Kwnz Bae Ndaw Doanghmowz

Daj Dij Sen Hax Kauq.

¹⁵ Gaj zwh Yezsuz gaj laeng gaj leuz bae gvae, dij goanz maz haenz dix baenz boangx se, maz biak dix koanx kauqfaengz dij Sen daj hawj dix ya aen chaej.

^y5:1 Aen kow Gowhnihsaxlowh naeh goj rongx hoak kow Zazliqliq.

^z5:14 Inxnaeh doihdo zawh hax dij noag daj dij mbej ix. Ndaw Sw Liqvaeq 14:1-32, Moahciz laiz jixzawh miz dij goanz gawz baenz nux yaq ya ndae, dij Sen yaix puj mbud dij Sen hoj hoakrawz hoak hawj daenh ruxndeq sowh goanz baenz nux naeh haeuz ndae yaq.

¹⁶Gaj dix kwnz bae ndaw doanghmowz sowh dih mboq miz gawz naeh daj dij Sen hax kauq.

Yeysuz Hawj Goanz Mungz Din

Mboq Rux Chaeg Ux Ndae

¹⁷Miz vaenz ux, Yeysuz zau goanzlai, dij goanz Fahliqsaiq daj sowh lauxswz zau *Sw Dij Sen* naeh goj yuq haenz naengh.^a Dij goanz Fahliqsaiq daj sowh lauxswz aeu *Sw Dij Sen* zau daenh naeh zawh daeq mbanj Zazliqliq longq rawz raeuh maz, daj mbanj Yaeuhdaq longq rawz raeuh maz, daeq Yezluqsaxlaengx daeuj. Doakriangz Zaeuj daj Yeysuz zaemh yuq, hawj dix rux ya chaej.

¹⁸Miz dij goanz aeu faz tam goanz puj chaej din mungz mboq rux chaeg ux maz, daz tam ndonj mwz ndaw rownz, aeu nyaengx doqnaj Yeysuz.

¹⁹Gaj dij goanz lai gvaq, ndonj mwz mboq baenz, paenqdix zoq kwnj mwz nyiangzrownz, aj jik nyiangzrownz, aeu goanz puj chaej naeh daj faz dix kven zoangq bae doqnaj Yeysuz. ²⁰Yeysuz leztaen paenqdix mizzaw sinq dix taeuq, zoq daj goanz puj chaej hax: "Mbauqreaueh, gux yangq gaenq hoakloang mawz eh." ²¹Sowh lauxswz zau *Sw Dij Sen* naeh daj dij goanz Fahliqsaiq zoq dungzcham: "Goanz naeh zawh gawz, hax sowh

kauq naeh ngah? Mizgaj dij Sen, gvaqmaz mboq miz gawz rux yangq gaenq hoakloang dij goanz. Baenzaqnaeh gaenqdix hoakzaqnaeh hax, dix aeu hoakri hoak dwx daj dij Sen baenzndeue, dix zawh hoak loang dij Sen!" ²²Yeysuz ruxndeue paenqdix dungzcham gaeng, zoq daj paenqdix hax: "Gaenqsu baenzaqrawz hoakzaqnaeh dungzcham mux? ²³Hax: 'Yangq gaenq hoakloang mawz eh!' Raj hax: 'Dwnq maz, daeq ndeh,' song yowngh naeh yowngh rawz hoak ngaih nyeuz mux?'^b ²⁴Gaj mbaenqnaeh gux ya goanz naeh hawj su lez, hawj su ruxndeue gux Lug Dij Goanz,^c yuq dihndin miz qenhliq yangq gaenq hoakloang dij goanz." Hax gaemz naeh yaq, dix daj goanz puj chaej din mungz mboq rux chaeg naeh hax: "Gux nemz mawz dwnq maz, gaem faz mawz, mwz rownz ndeh." ²⁵Goanz gaengnaeh cenq yuq doqnaj daengzle dwnq maz, gaem faz dix, biangz dij Sen, dauh mwz rownz. ²⁶Daengzle menq sawz menq zaemz, biangz dij Sen, ndaw zaw mbu taeuq, hax: "Vaenz naeh gaenqraeuz taen sowh saeh mboq sanz taen naeh eh!"

Yeysuz Rongx Liqvaeq Nowngz Dix

²⁷Gvaq ndauj ux yaq, Yeysuz og bae, dix leztaen goanz caeu coi q ux, minxzwh rongx hoak Liqvaeq,

^a5:17 Baih *Fahliqsaiq* zawh dij goanz puj Yaeuhtaiq. Paenqdix hax paenqdix biak fahlh Moahciz, gaj paenqdix goj zau daenh sowh zwzpujjeq zauh naeh.

^b5:23 Nganq puj Yaeuhtaiq maz hax, song yowngh naeh mizgaj dij Sen rux hoak baenz.

^c5:24 Yeysuz kwnzkwnz aeu aen minxzwh Lug Dij Goanz naeh nyaek hoakri. Aen minxzwh *Lug Dij Goanz* naeh yuq Sw Danqyixlix 7:13-14. Pujzawxkauq dij Sen, Danqyixlix, hax: *Zang'haemh gux daj paen'hwnz dungzlumj leztaen miz goanz ux daj lug dij goanz dungzlumj. Dix kviq pajfax maz dih dij Sen bwnzmiz miz daengznuauq naeh. Daenh zoq lingz dix mwz doqnaj dij Sen naeh. Gaenqdix ndaej dawjfax sowh rux gvanx daengzle naeh, gaj goanz gaj biangz dix, gaj goanz gaj biak dix. Hoakzaqnaeh, goh rawz gojvenj, changz rawz gojvenj, dij goanz hax sowh kauq rawz gojndae daengzle biangz dix, nwngz dix. Lug dij Goanz gvanx daenh daengznuauq, mboq miz gawz hawj goh dix lown.*

yuq dih caeu coiq naeh naengh. Yezsuz daj dix hax: "Maz nowngz gux!"²⁸ Liqvaeq zoq jizzaz daengzle nauq, maz nowngz dix, hoak cohsaenz dix.²⁹ Yaq Liqvaeq yuq rownz dix hoak gaenqjin lai taeuq, qingj Yezsuz jin, goj miz puj caeu coiq lai taeuq, naengz miz puj ndai tem daj paenqdix zaemh jin.³⁰ Dij goanz Fahliqsaiq daj sowh lauxswz zau *Sw Dij Sen* naeh zoq hax cohsaenz Yezsuz, paenqdix hax: "Gaenqsu baenzzaqrawz daj puj caeu coiq daj puj hoak loang zaemh jin zaemh ndut mux?"³¹ Yezsuz yaeng: "Puj mboq baenzchaej yungq mboq zoah puj ya chaej, mizgaj puj baenzchaej zux yungq zoah puj ya chaej."³² Gux mboq zawh daeuj cha sowh puj gaemz hax mboq miz naeh, zawh daeuj cha puj hoak loang, hawj puj hoak loang ndaw zaw dix gaix."

³³ Dij goanz Fahliqsaiq daj sowh lauxswz zau *Sw Dij Sen* naeh hax: "Cohsaenz Yezhanq jenjkaeuj hoakri, cohsaenz puj Fahliqsaiq gojvenj, gaj cohsaenz mawz jin niz jin, ndut niz ndut."³⁴ Yezsuz hax: "Goanz raep mez naeh daj puj qiang zaemh yuq, su hoakrawz hawj puj qiang jenjkaeuj mux?"³⁵ Gaj taeng zwz maz, goanz raep mez naeh zoah daenh gaep mwz, ni paenqdix, taeng zwz naeh, paenqdix zoq jenjkaeuj hoakri."³⁶ Yezsuz daeuq koanx aen bixliq ux hawj paenqdix biak, gaenqdix hax: "Mboq miz gawz riag sowj mawq daeuj kvaix paeng ux, yaq aeu kvaix paeng naeh bae pung sowj gaeuq. Jixzawh hoakzaqnaeh, hawj sowj mawq riag, yaq kvaix paeng riag daeq sowj mawq daeuj naeh daj sowj gaeuq goj mboq dungzpaeq."³⁷ Gaj mboq miz gawz aeu laeuj mawq nyaengx ndaw daehnaeng gaeuq. Jixzawh aeu laeuj mawq nyaengx daeh

naeng gaeuq, laeuj mawq gawh gau rawz rux hawj daeh naeng gaeuq tiag. Hoakzaqnaeh, laeuj goj roh nauq, daeh goj vaih.³⁸ Baenzzaqnaeh, laeuj mawq aeu nyaengx ndaw daeh naeng mawq.³⁹ Laeuj gaj nyaengx ndaej lai bi lej gaj van, gawz goj hax laeuj gaeuq van, gawz ndut laeuj gaeuq yaq, gawz goj mboq zawx ndut laeuj mawq."

Gawz Zawh Zaeuj Vaenz Cednoiq

6¹ Miz vaenz ux, zawh Vaenz Cednoiq, Yezsuz gvaq zoah haenz naz kaeujmeg, cohsaenz dix daet rongz kaeujmeg, aeu mungz fitfu, yaq aeu maet dix jin.² Miz jij goanz Fahliqsaiq ux hax: "Gaenqsu baenzzaqrawz hoak sowh gaenq Vaenz Cednoiq mboq hawj hoak naeh mux?"³ Yezsuz yaeng: "Zwz Daqvaeq daj sowh puj nowngz dix naeh dongxyaeg,^d dix hoakzaqrawz hoak su mboq sanz ndaej doag max?"⁴ Dix ndonj mwz zangjpungh dij Sen, jin sowh binx aeu baiz doqnaj dij Sen naeh, goj aeu hawj sowh puj nowngz dix naeh jin ndoij. Sowh binx naeh mizgaj puj mbud dij Sen zux hawj jin, gvaqmaz puj ndai mboq hawj jin."⁵ Yezsuz daeuq daj paenqdix hax: "Gux Lug Dij Goanz zawh zaeuj Vaenz Cednoiq."

Yezsuz Hawj Goanz Qen Chaej Ux Ndae

⁶ Gaj miz Vaenz Cednoiq ux, Yezsuz ndonj mwz rownzndawcowq zau daenh, dih naeh miz goanz ux, qensa dix nyaeb, chaeg mboq baenz, liaksaemjse.⁷ Sowh lauxswz zau *Sw Dij Sen* naeh daj dij goanz puj Fahliqsaiq zawx cha saek yowngh gauq Yezsuz, paenqdix zoq lez Yezsuz rux mboq rux

^d6:3 Daqvaeq zawh zwzpujjeq laux hongz Yixsowhleuh ux. Lez Sw Saxmuxex Bwnz Daih Aet 21:1-6.

yuq sowh Vaenz Cednoiq naeh ya chaej. ⁸Yeysuz ruxndeq paenqdix nwh gaeng, zoq daj goanz qensa chaeg mboq baenz naeh hax: "Dwnq maz, in doqnaj daengzle!" Goanz gaengnaeh zoq dwnq maz. ⁹Yeysuz daj daengzle hax: "Gux cham su, Vaenz Cednoiq hawj hoak saeh ndae rux hawj hoak saeh raix mux? Hawj jeuq dij goanz rux hawj kaj dij goanz mux?" ¹⁰Yeysuz lez bae haenzhenz baenqbeq, zoq daj goanz gaengnaeh hax: "Ed mungz mawz maz!" Goanz gaengnaeh daeh ed mungz dix maz, mungz dix zoq ndae, baenzzaqgaeuq. ¹¹Gaj dij goanz puj Fahliqsaiq daj sowh lauxswz zau *Sw Dij Sen* naeh jih taeuq, paenqdix dungzlaemh hoakrawz hoak mbowq dwk Yeysuz.

Yeysuz Lowg Sipngih Goanz Hoak

Dij Goanz Zawxkauq Dix

¹²Ndauj gaengnaeh, miz mbaed ux, Yeysuz mwz ndaw bo, daengz hwnz daj dij Sen hax kauq. ¹³Fax rungh yaq, dix rongx cohsaenz dix maz, lowg sipngih goanz, rongx sipngih goanz naeh hoak dij goanz zawxkauq Yeysuz. ¹⁴Sipngih goanz naeh zawh: Cizmaenh, goanz Yeysuz daeuq nyaek hoak Bihdowh naeh, Anzdowhleh goanz nongx zaiz Cizmaenh naeh, Yaqgowh, Yezhanq, Faezliq, Bazdozloahmaix, ¹⁵Maxtaiq, Dozmax, Yaqgowh goanz lug zaiz Yaqlowhfaez naeh, Cizmaenh goanz yuq ndaw dangxpaiq Faenqroi q naeh,^e ¹⁶Yaqgowh goanz lug zaiz Yaeuhdaq naeh, Yaeuhdaq goanz puj Zazyoah goanz daeklaeng aeu Yeysuz kai hawj sowh puj daj Yeysuz hoak dangqbaih naeh.

Yeysuz Aeu Kauqfaengz Dij

Sen Koanx Dwk Goanzlai

¹⁷Yeysuz daj paenqdix loangz daeq ndaw bo daeuj, yuq ndaw doanghpiang in, miz yowngh boangx cohsaenz daj dix zaemh yuq, goj miz yowngh boangx dij goanz daeq ndaw mbanj Yaeuhdaq, Yezluqsaxlaengx chaenh, haenz haij Taiq'ex chaenh daj Cizdunq chaenh maz. ¹⁸Paenqdix biak Yeysuz koanx kauqfaengz dij Sen, vanz Yeysuz ya aen chaej paenqdix, sowh puj zoah dij pi mwz ndang naeh goj hawj dix ya ndae. ¹⁹Ndang Yeysuz miz doakriangz daeuj, ya aen chaej ndae, baenzzaqnaeh, daengzle gaj goanz gaj zawx bae lumh dix.

Sowh Dij Goanz Rawz Rux Ndaej Faengz

²⁰Yeysuz ngangh to lez mwz doq cohsaenz dix, hax:

"Puj baenzluk faengz yah, unj mwznaj Goh dij Sen zawh gaengq gaenqsu.

²¹"Puj dongxyaeg faengz yah, unj mwznaj dij Sen rux hawj su imq. Puj gongz, puj haej faengz yah, unj mwznaj gaenqsu ndaej ko.

²²"Zwzrawz daenh cholaeng su daj gux Lug Dij Goanz hoak zaemh baih ej hwnq su, viangh su, mang su, moakndai su, gaenqsu zoq faengz yah. ²³Unj gaenqsu yuq ndaw fax ndaej sowh gaengq dij Sen aeu hoak gaengq byauxyangh naeh lai taeuq. Su goj ruxndeq zwzpujjeq puj zawxkauq dij Sen goj zoah zuxzungz rownz paenqdix hoakzaqnaeh dwk.

^e6:15 *Dangxpaiq Faenqroi*q daj Baih Cizlih zawh dangqbaih. Dangxpaiq naeh mboq venq biak fahliah Loahmax.

Sowh Dij Goanz Rawz Rux Mizaeh

²⁴ "Gaj puj baenzsaq aj, gaenqsu zoah yah! Unj sowh gaenq hawj gaenqsu zaih naeh haeuz nauq eh.

²⁵ "Puj jin imq aj, gaenqsu zoah yah! Unj mwznaj su rux zoah yaeg. Sowh puj ko naeh aj, gaenqsu zoah yah! Unj mwznaj gaenqsu rux ndaej gongz, ndaej haej.

²⁶ "Gawz goj haenh su zwzrawz, su zoq zoah yah. Unj zuxzungz rownz paenqdix goj zawh hoakzaqnaeh haenh puj zawxkauq dij Sen goanz zaj gaenqnaeh.

Gaenqsu Hoj Ngaiq Sowh Puj Daj Su Dangqbaih Naeh

²⁷ "Gux haxdoq sowh puj yuq inxnaeh biak gux koanx naeh: Nwh sowh puj daj su hoak dangqbaih naeh, doiq sowh puj hwnq su naeh ndae. ²⁸ Sowh puj mang su naeh, su vanz dij Sen gumx paenqdix, sowh puj hoak mbowq dwk su naeh, su saeh paenqdix vanz dij Sen. ²⁹ Jixzawh miz goanz saeuh naj mawz baih ux, mawz zoq ueq daengz baih gaengnaeh hawj dix saeuh. Jixzawh miz goanz aeu gongz sowj baihnog mawz, daengz gongz sowjndaw goj jizzaz dix aeu. ³⁰ Gawz dex mawz, zoq aeu hawj dix. Miz dij goanz aeu za'hoq mawz bae, zoq laek bae cham dix boiz. ³¹ Gaenqsu zawx hawj daenh hoakzaqrawz doiq su, su zoq hoakzaqrawz doiq daenh.

³² "Jixzawh su nwh gaj sowh puj nwh su naeh, su mboq suanq zawh gaeng. Daengz puj hoak loang goj nwh sowh puj nwh paenqdix naeh. ³³ Jixzawh su doiq gaj sowh puj doiq su ndae naeh ndae, su mboq suanq zawh gaeng. Daengz puj hoak loang goj doiq

sowh puj doiq paenqdix ndae naeh ndae. ³⁴ Jixzawh su jeq gaeng hawj daenh, nwh gaj hawj dix boiz, su mboq suanq zawh gaeng. Daengz puj hoak loang goj rux jeq hawj puj hoak loang, paenqdix ngwz daenh boiz zaqgaeuq. ³⁵ Gaenqsu nwh sowh puj daj su hoak dangqbaih naeh, doiq paenqdix ndae. Jeq gaeng hawj daenh, laek nwh daenh aeu maz boiz. Hoakzaqnaeh gaenqsu zoq ndaej sowh gaenq dij Sen aeu hoak gaenq byauxyangh naeh lai yah, gaenqsu baenz lug zaiz laux Sen dwx nyeuz daengzle naeh, ndaej yaiz dix. Unj dij Sen goj doiq sowh puj mboq mbaiq dix naeh daj puj mbowq zawkau taeuq. ³⁶ Daenh doiq su ndae mboq ndae, su goj doiq daenh ndae, hoakzaq Dez ndaw fax su naeh."

Jem Hoakri Goanq

³⁷ "Gaenqsu laek pyaemj daenh, gaenqsu zoq mboq zoah dij Sen pyaemj. Daenh hoak loang gaeng, laek hax dix hoj tw'taeb gaenq hoakloang dix. Hoakri su hoak loang gaeng, dij Sen goj zux mboq hax su hoj tw'taeb gaenq hoakloang su. Su yangq gaenq hoakloang daenh, dij Sen zoq yangq gaenq hoakloang su mboqyaq. ³⁸ Su aeu hawj daenh, zoq miz gaenq aeu hawj su mboqyaq. Su aeu gaeng chau hawj daenh, dij Sen zoq aeu gaeng chau hawj su mboqyaq, naengz fa gaemh nyedred, daek daemdw hawj su."

³⁹ Yezsuz aeu bixliq daj paenqdix hax: "Puj ta'mbud hoakrawz saeh puj ta'mbud lingzloh mux? Jixzawh puj ta'mbud haeggaj saeh puj ta'mbud lingzloh, rux hawj daengz song goanz laemq roangj mboqyaq. ⁴⁰ Cohsaenz mboq rux dwx nyeuz lauxswz, daengz daj lauxswz doag gah

zwzrawz, goj zux dwx daj lauxswz dungzlumj naeuj. ⁴¹ Baenzaqrawz leztaen ndaw ta bihnongx miz i nyaebnyangj ux, ej lez mboq taen ndaw ta hoakri miz yaengh ndeaj maex mux? ⁴² Mawz lez mboq taen ndaw ta hoakri miz maex, hoakrawz ej daj bihnongx mawz hax: 'Bihongx, hawj gux aeu nyaebnyangj ndaw ta mawz ni'? Mawz naeh ah, baeg daj zaw mboq dungzlumj! Aeu maex ndaw ta hoakri ni daekgoanq, zux leztaen singjringh, hoakzaqnaeh zux aeu nyaebnyangj ndaw ta bihnongx mawz ni baenz.

Puj Ndae Hoak Gaenq ndae, Puj Mbowq Hoak Gaenq mbowq

⁴³ "Maex ndae mboq rux miz maeg ndoag, maex ndoag mboq rux miz maeg ndae. ⁴⁴ Lez maeg zoq ruxndeq zawh maex ndae rux zawh maex ndoag. Maex nam mboq rux miz maeg'vowh, kaeunam goj mboq rux miz maegkaeu'it. ⁴⁵ Ndaw zaw nwh gaeng, ndaw baeg zoq hax gaeng. Ndaw zaw puj ndae nwh gaenq ndae, dix zoq hax gaenq ndae. Ndaw zaw puj mbowq nwh gaenq mbowq, dix zoq hax gaenq mbowq.

Song Yowngh Dij Goanz Daengj Rownz

⁴⁶ "Gaenqsu baenzaqrawz rongx gux 'Zaeuj aj, Zaeuj aj' gaj mboq biak kauq gux bae hoak mux? ⁴⁷ Nanghgaj gawz maz haenz gux, biak kauq gux yaq bae hoak, gux haxdoq su dix zawh sowh dij goanz rawz. ⁴⁸ Dix daj goanz ux daengj rownz dungzlumj, mbut dej dix ndaek, hawj dej dix bae daeux dih miz tin. Naemxnongz daeuj zwzrawz, daengh zoah aen

rownz naeh, goj mboq rux hawj aen rownz naeh vae. Unj aen rownz naeh dix daengj zoah dih hoj, zoah dih miz tin vwnx. ⁴⁹ Gaj sowh goanz biak yaq mboq bae hoak naeh, zoq daj sowh dij goanz yuq now namh saiz daengj rownz naeh dungzlumj, mboq miz tin'dinsaeu. Naemxnongz daeh daengh, zoq cenq laemx, vaihveh nauq."

Yeysuz Hawj Goanz Puj koj Lenzangx Ux Ndae

7 ¹ Yeysuz daj daengzle hax nauq suq kauq naeh yaq, zoq ndonj mwz ndaw longq Zazbowhnungh. ² Dih naeh miz goanz leanhzangx ux,^f goanz leanhzangx naeh miz goanz puj koj ux baenzchaej, zaekgaj tai, goanz puj koj naeh yuq ndaw zaw leanhzangx zawh goanz ux. ³ Lenzangx ruxnyinz suq saeh Yeysuz naeh, zoq qingj jij goanz puj Yaeuhtaiq sowh puj jeq gvanx rownzndawcowq naeh bae dih Yeysuz naeh, vanz Yeysuz maz ya goanz puj koj dix. ⁴⁻⁵ Sowh puj Yaeuhtaiq puj jeq gvanx rownzndawcowq naeh zoq maz dih Yeysuz naeh, vanz Yeysuz zaeh zaeh. Paenqdix hax: "Goanz leanhzangx naeh ngaiq puj Yaeuhtaiq raeuz, saeh raeuz daengj rownzndawcowq, dix paeq hawj mawz sach." ⁶ Yeysuz zoq daj paenqdix zaemh mwz. Gau Yeysuz zaekgaj mwz taeng rownz leanhzangx naeh, leanhzangx qingj dungzbowh dix jij goanz ux daeuj hoakzaqnaeh hax: "Zaeuj aj! Mahfanh mawz gvaq eh, gux mboq paeq hawj mawz haeggaj maz rownz gux, ⁷ gux goj mboq paeq bae taen mawz. Nanghgaj mawz hax gaemz kauq ux, puj koj gux zoq ndae mboqyaq. ⁸ Gux goj yuq baihdawj daenh hoak saeq, baenz biak daenh

^f7:2 Yuq ndaw Goh Loahmax, goanz leanhzangx ux gvanx baeg goanz bin ux.

hoak, gaj baihdawj gux goj miz bin, bin baenz biak gux hoak. Gux daj bin gux goanz naeh hax: ‘Bae!’ Dix zoq bae. Gux daj goanz mawq hax: ‘Maz’ dix zoq maz. Gux daj puj koj gux hax: ‘hoak gaeng naeh!’ Dix zoq hoak.”⁹ Yezsuz ruxnyinz suq kauq naeh, zoq menq sawz menq zaemz, ueqlaeng bae daj boangx nowngzlaeng dix naeh hax: "Gux haxdoq su, dix mizzaw sinq gux baenzaqnaeh, daengz puj Yixsowhleleh gux naengz mboq sanz taen gawz mizzaw sinq gux baenzaqnaeh.”^g ¹⁰ Sowh puj leanhzangx qingj daeuj naeh dauh mwz taeng rownz, leztaen goanz puj koj gaengnaeh haeuz ndae yaq.

Yezsuz Yuq Ndaw Longq Nahyinz Naeh

Hawj Goanz Tai Ux Daeuq Zaeu

¹¹ Doaklaeng Yezsuz bae longq ux, longq naeh minxzh rongx hoak Nahyinz, miz cohsaenz dix daj yaengh boangx goanz dwx daj dix zaemh bae. ¹² Gau Yezsuz zaekgaj bae daeux baeg longq naeh, daenh tam goanz puj tai ux daeuj. Goanz puj tai naeh rownz dix zux miz goanz zaiz doag dix, dez dix goj haeuz tai yaq, meh dix zawh yahmajj, ndaw longq dix miz yaengh boangx goanz hoak bownh meh dix daeuj. ¹³ Zaeuj leztaen yah po haeuz tai yaq naeh, zoq zawchaej dix, daj dix hax: "Laek haej!" ¹⁴ Yaq Yezsuz daeq mwz naj, aeu mungz lumh zaqmaex tam goanz puj tai naeh, sowh puj tam naeh zoq ced. Yezsuz hax: "Mbauqreauh, gux nemz mawz dwnq maz!" ¹⁵ Goanz puj tai naeh zoq dwnq maz naengh, aj baeg hax kauq. Yezsuz aeu dix hawj meh dix.

¹⁶ Daengzle menq sawz menq mbu, biangz dij Sen hax: "Zawjraeuz miz goanz puj zawxkauq dij Sen ux yah, dix haen taeuq." Yaq daeuq hax: "Dij Sen daeuj zauzhuz dij goanz dix yah!" ¹⁷ Yaq gaeng Yezsuz hoak naeh zoq leuz daengz mbanj Yaeuhdaq daj sowh longq haenzhenz naeh nauq.

Yezhanq Nemz Song Goanz Cohsaenz

Dix Bae Dih Yezsuz Naeh

¹⁸ Cohsaenz Yezhanq aeu suq saeh Yezsuz hoak naeh dauh mwz haxdoq Yezhanq. Yezhanq zoq rongx cohsaenz dix maz song goanz, ¹⁹ yaix paenqdix mwz dih Zaeuj naeh, hoakzaqnaeh hax: "Zwzpujjeq, puj zawxkauq dij Sen hax rux daeuj goanz ux jeuq dij goanz. Goanz naeh zawh mawz vah? Rux naengz hawj piu taj puj ndai ah?" ²⁰ Song goanz naeh mwz taeng dih Yezsuz naeh, hax: "Yezhanq goanz saeh daenh hoak diauq zauh soiq naeh yaix piu maz cham mawz: ‘Mawz zawh goanz daeuj jeuq dij goanz naeh vah? Rux naengz hawj piu taj puj ndai ah?’”^{*} ²¹ Laemh gau naeh, Yezsuz ya ndae puj baenzchaej, ya ndae sowh puj baenzchaej naek naeh goanz lai taeuq, daem sowh dij pi mwz ndang naeh ni, hawj puj ta'mbud rux leztaen goanz lai taeuq. ²² Yezsuz yaeng paenqdix: "Gaenqsu dauh mwz, aeu sowh gaeng su leztaen naeh daj sowh gaeng su ruxnyinz naeh haxdoq Yezhanq. Zoq zawh puj ta'mbud rux leztaen, puj ka'ndiak ka dix daeuq ndae rux daeq yaeb'yaeb, puj baenznux ndaej ndae sawrik, puj chu'nog rux ruxnyinz, puj tai rux daeuq zaeu, puj baenzluk ndaej ruxnyinz kauqfaengz dij

^g7:9 Inxnaeh dij goanz Yixsowhleleh zoq zawh hax dij goanz Yaeuhtaiq.

^{*}7:20 Maxlazjiz 3:1.

Sen.²³ Gawz leztaen sowh gaeng gux hoak naeh, goj naengz zaemz gux, gawz zoq faengz yah."

Yezsuz Laemh Yezhanq

²⁴ Sowh puj Yezhanq yaix daeuj naeh dauh mwz yaq, Yezsuz zoq laemh Yezhanq dwk daengzle, dix hax: "Jeh Yezhanqyuq ndaw doanghmowz naeh, gaenqsu bae ndaw doanghmowz lez gaeng mux? Lez sowh maexoaj laemz baeuq vae bae vae dauh naeh maj? ²⁵ Gaenqsu og bae lez gaeng mux? Lez sowh puj nungh ndangnungh yawz, zaijjenz faihfog naeh maj? Sowh goanz naeh lej yuq ndaw rownzhongz ndowj mbezneh. ²⁶ Haenx, gaenqsu og bae lez gaeng mux? Lez puj zawxkauq dij Sen raj? Wnh. Gux haxdoq su, Yezhanq mboq daeg daeg zawh gaj puj zawxkauq dij Sen. ²⁷ Ndaw *Sw Dij Sen* hax: '*Mawz lez, gux nemz puj zawxkauq gux, mwznaj hawj gaenqdix bae daekgoanq mawz, saeh mawz lauh ka loh,*' gaemz naeh zawh hax dix.^h ²⁸ Gux haxdoq su, nanghgaj zawh dij goanz,ⁱ mboq miz gawz dwx nyeuz Yezhanq, gaj yuq goh dij Sen, daengz sowh puj mboq miz najta saek'i naeh naengz dwx nyeuz dix." ²⁹ Sowh puj ndaej hawj Yezhanq saeh hoak diauq zauh soiq naeh dij sowh puj caeu coiq ndaej hawj Yezhanq saeh hoak diauq zauh soiq naeh naeh, ruxnyinz gaemz kauq naeh, zoq hax dij Sen hoak hoj zaeh. ³⁰ Gaj dij goanz puj Fahliqsaiq dij sowh lauxswz aeu *Sw Dij Sen* zau daenh naeh, paenqdix mboq ndaej hawj Yezhanq saeh hoak diauq zauh soiq naeh, paenqdix zoq mboq daeq ka loh

dij Sen dox nyaengx hawj paenqdix naeh. ³¹ Yezsuz daeuq hax: "Gux aeu dij goanz gannaeh bij hoak gaeng nix? Paenqdix lumj gaeng nix? ³² Paenqdix dij sowh engliak naengh zang hw naeh dungzlumj, goanz lej rongx goanz, hax: 'Gaenqpiu saeh su baeuq naeuz, gaenqsu ej mboq tiauuq. Gaenqpiu lownxhaej, gaenqsu ej mboq haej.' ³³ Zoq zawh hax: Yezhanq goanz saeh daenh hoak diauq zauh soiq naeh daeuj, mboq jinkauej, mboq ndut laeuj, gaenqsu hax dix zoah dij pi mwz ndang. ³⁴ Gux Lug dij Goanz daeuj, jin niz jin, ndut niz ndut, gaenqsu hax: 'Goanz naeh maeux laeuj, maeux jin, dij puj caeu coiq, dij puj hoak loang hoak dungzbownh.' ³⁵ Gaj aen gvai dij Sen zoq zawh aen gvai dij Sen, daenh leztaen sowh puj biak aen gvai naeh, daenh zoq ruxndeq aen gvai dij Sen zawh zaeh."

Yezsuz Yangq Goanz Puj Nyingz Hoakloang Ux

³⁶ Miz goanz dij goanz Fahliqsaiq ux, qingj Yezsuz mwz rownz dix dij dix zaemh jinkauej, Yezsuz zoq mwz. ³⁷ Longq naeh miz goanz nyingz ux zawh puj hoak loang, dix ruxndeq Yezsuz maz rownz dij goanz Fahliqsaiq jinkauej, zoq gaem aen pinh viq ux maz, ndaw pinh laep gaeng ux hom taeuq, ³⁸ dix in yuq baihlaeng Yezsuz, yuq haenz din Yezsuz haej, naemxta lae bae daengz din Yezsuz yaij nauq, dix aeu koanto dix jiat kawq, aeu baeg dix zup din Yezsuz, aeu gaeng hom daz din Yezsuz. ³⁹ Goanz dij goanz Fahliqsaiq qingj Yezsuz mwz jinkauej naeh leztaen, ndaw zaw nwh: "Goanz nyingz naeh

^h7:27 Gaemz kauq naeh haeuz yuq *Sw Yixsaiqyaq* 40:3.

ⁱ7:28 *Nanghgaj zawh dij goanz* gaemz naeh, bwnz aeu kauq *Cizlah laiz* naeh zawh hoakzaqnaeh hax: *Nanghgaj zawh puj nyingz zowngx.*

zawh puj hoak loang, jixzawh Yezsuz zawh puj zawxkauq dij Sen, dix toj ruxndeq goanz lumh dix naeh zawh puj hoak loang, zawh sowh puj nyingz rawz." ⁴⁰ Yezsuz daj dix hax: "Cizmaenh, gux miz kauq daj mawz hax." Cizmaenh yaeng: "Lauxswz, mawz hax." ⁴¹ Yezsuz hax: "Miz goanz ux, miz song goanz baznij dix, goanz ux baznij dix haj baeg downnah ngaenz, goanz ux baznij dix hajsip downnah ngaenz." ⁴² Daengz song goanz boiz mboq qix, goanz gaengnaeh zoq mboq hawj doiqdix boiz, yangq nij doiqdix. Mawz hax, song goanz baznij naeh, goanz rawz ngaiq goanz yangq nij doiqdix naeh nyeuz?" ⁴³ Cizmaenh yaeng: "Gux nwh maz ingj zawh goanz zoah yangq lai nyeuz naeh." Yezsuz hax: "Mawz hax hoj yah." ⁴⁴ Yaq Yezsuz ueqnaj bae doq goanz nyingz gaeng naeh, daj Cizmaenh hax: "Mawz leztaen goanz nyingz naeh vah? Gux maz rownz mawz, mawz mboq aeu naemx hawj gux soi q din, gaj goanz nyingz naeh aeu naemxta lae bae daengz din gux yaij nauq, aeu koanto dix jiat kawq." ⁴⁵ Mawz mboq hoakzaq dungzbowh bihnongx naeh zup naj gux, gaj goanz nyingz naeh, daeq gaengqgux maz rownz mawz, zoq zup din gux bae dauh bae dauh. ⁴⁶ Mawz mboq aeu yuz maeghit lup to gux, gaj goanz nyingz naeh aeu gaengq hom daz din gux. ⁴⁷ Baenzaqnaeh gux haxdoq mawz, goanz nyingz naeh hoak loang lai taeuq, gaengq hoakloang dix yowngh rawz goj zoah yangq nauq, gaengqz zoq ngaiq lai nyeuz. Gawz zoah yangq ix, gawz zoq ngaiq ix." ⁴⁸ Yezsuz daj goanz nyingz naeh hax: "Gaengq hoak loang mawz zoah yangq yah." ⁴⁹ Sowh puj daj dix zaemh jinkaeuj naeh ndaw zaw nwh:

"Goanz naeh zawh gawz ah? Dix rux yangq gaengq hoakloang dij goanz maj?" ⁵⁰ Yezsuz daj goanz nyingz naeh hax: "Mawz sinq gux, mawz ndaej jeuq yah, dauh mwz vangqdangh ndeh!"

Le Yah Nowngz Yezsuz Naeh

8 ¹ Mboq ndowj lai, Yezsuz bae ndaw chaenh, bae ka'mowngz, koanx kauqfaengz goh dij Sen dwk daenh, sipngih goanz cohsaenz dix daj dix zaemh yuq. ² Goj miz jiq yah nyingz ux daj dix zaemh yuq, le yah naeh koax daekgoanq paengqz mbangj goanz zoah dij pi mwz ndang, mbangj goanz miz aen chaej, doaklaeng zoah Yezsuz ya ndae. Le yah naeh miz yah ux zawh Maxliqyaq ndaw longq Moahdaqlaz naeh, Yezsuz ndaej saeh dix daem jiat do pi ni ndang dix. ³ Miz yah ux zawh Yezyaqnah yah mijmez Guxsax naeh. Goanz Guxsax naeh saeh laux hongz Cizlih gvanx ndaw rownz. Miz yah ux zawh Suzsanznah, naengz miz lai yah tem, paengqz aeu ngaenzjenz hoakri saeh Yezsuz daj cohsaenz Yezsuz.

Aen Bixliq Sauq Kaeujmeg Naeh

⁴ Miz vaenz ux, miz dij goanz lai taeuq yuq henz Yezsuz, goj naengz miz dij goanz daeq mbanj rawz raeuh maz, Yezsuz zoq aeu aen bixliq ux koanxdwk paengqz, dix hax: ⁵ "Miz goanz puj hoak gaengx ux bae sauq kaeujmeg. Gau dix sauq naeh, mbangj maet doak bae ka loh, zoah dij goanz nyanx, zoah dij noag jin nauq. ⁶ Mbangj maet doak bae jeh tin, mboq miz naemx, kawq gvaq, faenzkaeuj daeh ngaed zoq choj

^{j7:41} Zwz naeh goanz puj hoak gaengx ux hoak gaengx vaenz ux zoq ndaej downnah ngaenz ux.

nauq. ⁷ Mbangj maet doak bae jeh nyaj,^k nyaj daj go kaeuj zaemh maj, doaklaeng go kaeuj zoq zoah yaz nauq. ⁸ Mbangj maet doak bae dih namh yawz, zoq kwnj maz, baenz jin, ndaej lai nyeuz baeg daep." Dix hax suq kauq naeh yaq, zoq caqsiq hax: "Miz mbawchu rux biak, zoq caqsiq biak!"

Baenzaqrawz Yeysuz Aeu

Bixliq Koanxdwk Daenh

⁹ Cohsaenz dix cham dix aen bixliq naeh zawh hax gaeng. ¹⁰ Yeysuz hax: "Goh dij Sen, koax daekgoanq dix mboq hawj gawz ruxndeq, gannaeh dix hawj su ruxndeq, gaj puj ndai dix naengz mboq hawj ruxndeq. Daj puj ndai gux aeu bixliq koanxdwk paenqdix, hawj paenqdix lez lej lez, gaj lez mboq taen, biak lej biak, gaj mboq ruxndeq.

Aen Bixliq Sauq Kaeujfaenz

Naeh Zawh Hax Gaeng

¹¹ "Aen bixliq naeh zawh gaeng naeh: Faenzkaeuj zawh hax kauq dij Sen. ¹² Sowh maet doak bae ka loh naeh zawh hax: dij goanz ndaej biak kauq dij Sen yaq, do gvanx dij pi naeh cenq maz longx kauq dij Sen daeq ndaw zaw paenqdix bae,¹ hawj paenqdix mboq sinq mboq ndaej jeuq. ¹³ Sowh maet doak bae jeh tin naeh zawh hax: dij goanz ndaej biak kauq dij Sen yaq, ndaw zaw faengz, zoq cenq sinq kauq dij Sen ndauj ux, gaj kauq dij Sen yuq ndaw zaw paenqdix daj go kaeuj mboq miz laeg dungzlumj, daeh ciq paenqdix, paenqdix zoq

zoangq. ¹⁴ Sowh maet doak bae jeh nyaj naeh zawh hax: dij goanz ndaej biak kauq dij Sen yaq,^m gaj pyej gaeng dihndin lai yowngh gvaq, zoah ngaenzjenz, gaenqzaih gaenqfaengz tumj nauq, zoq mboq miz maet maeg. ¹⁵ Gaj sowh maet doak bae dih namh yawz naeh, zoq zawh dij goanz ndaej biak kauq dij Sen yaq, zawswh zawndae dawz dix, hoj sanq hoj taj, taengdeg dix baenz jin.

Gaeng Aeu Gowx Ndae Mwznaj

Miz Dij Goanz Ruxndeq

¹⁶ "Mboq miz gawz diamj daeng yaq aeu aen raeng gumq, rux aeu nyaengx dawj tanj, ej mboq aeu nyaengx now zongz! Daeng aeu nyaengx now zongz, hawj puj ndonj maz zux leztaen rungh. ¹⁷ Gaeng saeh gojvenj, daengz aeu gowx ndae gajrawz goj rux miz puj ruxndeq, gaeng saeh gojvenj, daengz aeu yaz ndae gajrawz goj rux miz puj ruxndeq. ¹⁸ Gawz ruxndeq kauq dij Sen, dij Sen zoq hawj dix ruxndeq tem, gawz mboq ruxndeq kauq dij Sen, daengz gaenqdix hax gaenqdix ruxndeq naeh dij Sen naengz hawj dix mboq ruxndeq. Baenzaqnaeh su caqsiq biak ndae'ndowq."

Gawz Zawh Dij Goanz Rownz Yeysuz

¹⁹ Meh Yeysuz daj le nongx zaiz Yeysuz maz dih Yeysuz naeh, gaj miz dij goanz lai gvaq, paenqdix mwz haenz Yeysuz mboq baenz. ²⁰ Miz dij goanz haxdoq Yeysuz: "Meh mawz daj le bihnongx zaiz mawz yuq baihnog, paenqdix cha mawz." ²¹ Yeysuz

^k8:7 Inxnaeh mbaednduq zawh hax: *Mbangj maet doak bae jeh nam, nam daeh roak maz, zoq yaz nauq.*

^l8:12 Laux hongz dij pi minxzh dix rongx hoak "Sazdanz."

^m8:14 Inxnaeh mbaednduq zawh hax: *Sowh maet doak bae jeh nam naeh zawh hax dij goanz biak kauq dij Sen yaq.*

yaeng: "Gawz biak kauq dij Sen bae hoak, gawz zoq zawh meh gux, bihnongx zaiz gux."

Yeysuz Hawj Laemz Dwax Mbaet,

Hawj Naemx Fowd Gah

²² Miz vaenz ux, Yeysuz daj cohsaenz dix kwnj mwz ndaw lowz, dix daj paenqdix hax: "Gaenqraeuz uaij lowz bae doiqfaeg." Paenqdix zoq uaij lowz bae. ²³ Gau lowz chaeg naeh, Yeysuz noanzlaep. Ndaw kow hubhaeb miz laemz dwax, lowz zaekgaj zaem, nyinzndang taeuq. ²⁴ Cohsaenz Yeysuz byoak Yeysuz, daj dix hax: "Lauxswz, lauxswz, gaenqpiu zaekgaj tai yaj!" Yeysuz ruxndownq, zoq hwt laemz hwt naemx, laemz daj naemx zoq byaek zoq dingh. ²⁵ Yeysuz daj paenqdix hax: "Gaenqsu baenzaqrawz naengz mboq siq gux mux?" Cohsaenz dix mbu taeuq, sawz taeuq, goanz lej daj goanz hax: "Dix zawh gawz mux? Dix yaix laemz daj naemx, laemz daj naemx goj biak dix ngah."

Ya Ndae Goanz Gowhlazsaenz Zoah

Dij Pi Mwz Ndag Naeh

²⁶ Paenqdix uaij lowz mwz taeng doiqfaeg aen kow Zazliqliq, dih dij goanz Gowhlazsaenz yuq naeh. ²⁷ Longq naeh miz goanz ux zoah dij pi mwz ndang. Gau Yeysuz hiamq mwz taeng dihliangx naeh, goanz dij pi mwz ndang naeh daeq maz doq Yeysuz. Goanz naeh haeuz ndowj taeuq mboq nungh ndangnungh, mboq yuq ndaw rownz ndowj, yuq gaj ndaw mohbujreuh ndowj. ²⁸ Dix daeh taen Yeysuz, zoq gvih bae doqnaj dix rongx: "Yeysuz, lug zaiz dij Sen dwax nyeuz daengzle naeh, mawz

baenzaqrawz daet gux? Vanz mawz laek vazkuz gux." ²⁹ Dij pi baenzaqrawz hoakzaqnaeh hax, zawh Yeysuz haeuz nemz dij pi daeq ndaw ndang goanz naeh og daeuj. Laemh goanz naeh, dix kwnz zoah do pi naeh jenj, dix goj ndaej zoah daenh aeu tiksaed puk, yaq naengz miz dij goanz dawz, gaj dix tip daengz tiksaed kaed nauq, zoah dij pi daem bae ndaw doanghmowz. ³⁰ Yeysuz cham dix: "Minxzwh mawz rongx hoak gawz?" Dix yaeng: "Rongx hoak boangx." Unj, dij pi mwz ndang goanz naeh lai taeuq, minxzwh dix zoq rongx hoak Boangx. ³¹ Paenq pi naeh vanz Yeysuz, laek daem paenqdix bae luh mboq miz dej naeh.

³² Haenz bo paenqdix yuq naeh miz boangx mu ux jin gaenqjin. Paenqdix vanz Yeysuz hawj paenqdix mwz ndaw boangx mu naeh. Yeysuz zoq hawj paenqdix mwz. ³³ Dij pi daeq ndaw ndang goanz naeh og daeuj, mwz ndaw boangx mu naeh. Boangx mu naeh lenh bae aen ndanq haenz kow naeh, doak bae ndaw kow, daengzle zaem tai nauq.

³⁴ Puj dawz mu leztaen sowh saeh naeh zoq lenh ni, lenh mwz hangzwh, bae ka'mowngz haxdoq daenh mbaed saeh naeh. ³⁵ Daenh zoq maz lez zawh gaeng saeh, maz taeng dih Yeysuz naeh, leztaen goanz dij pi haeuz mboq yuq ndang naeh, nungh ndangnungh naengh doqnaj Yeysuz, yuq dih naeh dinghleuj. Paenqdix zoq mbu taeuq. ³⁶ Sowh puj ndaej taen mbaed saeh naeh zoq haxdoq paenqdix goanz zoah dij pi mwz ndang naeh hoakrawz ndaej ya ndae. ³⁷ Dij goanz mbanj Gowhlazsaenz naeh mbu taeuq, baenzaqnaeh paenqdix daengzle vanz Yeysuz ni paenqdix. Yeysuz zoq naengh lowz dauh bae. ³⁸ Goanz dij pi haeuz ni dix naeh vanz Yeysuz,

vanz Yeysuz hawj dix nowngz bae ndoij. Gaj Yeysuz nemz dix dauh bae, hax: ³⁹ "Mawz dauh bae rownz ndeh, bae laemh dij Sen saeh mawz hoak gaeng saeh." Goanz naeh zoq daeq daengz hangzhw nauq, laemh Yeysuz saeh dix hoak gaeng saeh.

Yezsuz Ya Goanz Nyingz Baih Dawj Baenz Sowh Lowd Lae Naeh Ndae

⁴⁰ Daengzle taj Yeysuz, gau Yeysuz dauh maz naeh, daengzle bae raep dix. ^{41–42} Miz goanz ux rongx hoak Yeznuq, dix gvanx rownzndawcowq dih naeh, dix miz ndiq lug nyingz doag, ndiq lug nyingz dix ndaej teq sipngih bi ux naeh, ndiq lug nyingz dix zaekgaj tai. Baenzaqnaeh dix gvih bae doqnaj Yeysuz, vanz Yeysuz bae rownz dix.

Gau Yeysuz daj dix bae naeh, miz dij goanz lai taeuq nyenj Yeysuz. ⁴³ Miz goanz nyingz ux, baihdawj dix gaj vaenz gaj baenz sowh chaej lowd lae naeh, haeuz baenz ndaej sipngih bi, dix bae dih bae lez aen chaej, jenz dix bae ndaw mungz puj ya chaej nauq, gaj mboq miz gawz ya dix ndae. ⁴⁴ Dix nyenj maz baihlaeng Yeysuz, lumh din sowj Yeysuz, sowh dih lowd lae dix naeh cenq mbaet. ⁴⁵ Yeysuz hax: "Gawz lumh gux ah?" Daengzle gawz goj mboq yinq. Bihdowh hax: "Lauxswz, daengzle nyenj mawz." ⁴⁶ Gaj Yeysuz hax: "Gux ruxndeq doakriangz gux daeq ndang gux bae, miz dij goanz lumh gux singjringh." ⁴⁷ Goanz nyingz gaengnaeh ruxndeq gowx mboq gvaq, saenq rowdrowd daeq maz doq Yeysuz, gvih bae doqnaj Yeysuz, yuq doqnaj daengzle haxdoq Yeysuz dix baenzaqrawz lumh Yeysuz, yaq aen chaej dix hoakzqrawz cenq ndae. ⁴⁸ Yeysuz daj dix hax: "Lugnyingz, mawz

sinq gux, mawz ndaej jeuq yah, mawz dauh bae vangqdangh ndeh!"

Yezsuz Hawj Ndiq Nyingz Ux Daeuq Zaeu

⁴⁹ Gau Yeysuz hax kauq naeh, miz dij goanz daeq rownz Yeznuq goanz gvanx rownzndawcowq naeh maz, daj Yeznuq hax: "Lugnyingz mawz haeuz tai yaq, naengz mahfanh lauxswz hoak gaeng mah?"

⁵⁰ Yeysuz ruxnyinz zoq daj Yeznuq hax: "Laek mbu, nanghgaj sinq, lug nyingz mawz zoq ndaej jeuq."

⁵¹ Mwz taeng rownz Yeznuq yaq, Yeysuz hawj gaj Bihdowh, Yezhanq, Yaqgowh, bohmech ndiq nyingz naeh daj dix zaemh mwz ndaw rownz, gvaqmaz puj ndai mboq hawj mwz. ⁵² Dij goanz dih naeh daengzle haej ndiq lug nyingz naeh, haej vauhvauh.

Yeysuz hax: "Laek haej, ndiq naeh mboq zawh tai, zawh noanzlaep naeuj." ⁵³ Paenqdix ruxndeq ndiq naeh haeuz tai yaq zoq kosaemj dix. ⁵⁴ Yeysuz laeg qen ndiq naeh, rongx dix: "Lugnyingz, dwnq maz!"

⁵⁵ Minghkoan ndiq naeh dauh daeuj, ndiq naeh zoq cenq dwnq maz, Yeysuz yaix sowh puj yuq ndaw rownz naeh aeu kaeujpyaek maz hawj ndiq naeh jin. ⁵⁶ Bohmech ndiq naeh sawz taeuq. Yeysuz yaix paenqdix laek aeu sowh saeh naeh haxdoq daenh.

Yezsuz Nemz Sipngih Goanz Dij Goanz Zawx Kauq Dix Bae Zau Daenh

9 ¹ Yeysuz rongx daengz sipngih goanz dij goanz zawxkauq dix maz, aeu doakriangz daj qenhliq hawj paenqdix, hawj paenqdix rux ndaem dij pi, sowh dij pi rawz goj rux ndaem, hawj paenqdix rux ya chaej, ² nemz paenqdix og bae, aeu kauqfaengz Goh dij Sen koanx dwk daenh daj saeh daenh ya

chaej. ³ Yezsuz daj paenqdix hax: "Gaenqsu og bae, laek laep gaeng bae, laek tw maexdaeux, laek laep daeh, laek laep gaenqjin, laek laep jenz, goj laek laep sowh sowj aeu lwh ndang naeh, ⁴ yuq rownz gawz ndowj, zoq ndowj taengdiak su ni. ⁵ Jixzawh miz dij goanz mboq venq hawj su ndowj, su ni longq naeh zwzrawz, chaeuq mowdmoanz ndaw din su ni, hoakzaqnaeh zawh hax paenqdix hoak mboq hoj." ⁶ Yaq paenqdix zoq og bae, bae longq bae longq, koanx kauqfaengz dij Sen dwk daenh, saeh daenh ya chaej.

Cizlih Mboq Ruxndeq Yezsuz Zawh Gawz

⁷ Cizlih goanz yuq baihdawj laux hongz Goh Loahmax hoak hongz naeh, dix ruxnyinz suq saeh Yezsuz hoak naeh, mboq ruxndeq zawh gaeng saeh. Cizlih baenzaqrawz mboq ruxndeq gaenq Yezsuz hoak naeh zawh gaeng saeh, zawh dix ruxnyinz miz dij goanz hoakzaqnaeh laemh Yezsuz: "Dix zawh Yezhanq tai yaq daeuq zaeu." ⁸ Goj ruxnyinz miz dij goanz hax: "Dix zawh Yixliqyaq, Yixliqyaq daeuq daeuj yah." Naengz ruxnyinz miz dij goanz hax: "Dix zawh zwzpujjeq puj zawxkauq dij Sen goanz ux daeuq zaeu." ⁹ Cizlih hax: "Gux haeuz daet to Yezhanq yaq, gux ruxnyinz Yezsuz gannaeh hoak sowh saeh naeh, dix zawh gawz nix?" Yaq dix zoq nwh bae taen Yezsuz.

Suanq Gaj Puj zaiz, Yezsuz Hawj

Haj Tiang Goanz Jin Imq

¹⁰ Dij goanz zawxkauq Yezsuz dauh maz, paenqdix og bae hoak gaeng raeuh, paenqdix laemh dwk Yezsuz, Yezsuz zoq zowz gaj paenqdix haeggaj

bae longq Boahsaiqdaq. ¹¹ Puj ndai ruxndeq goj nowngz dix bae. Paenqdix daeuj, Yezsuz zaemz paenqdix, laemh Goh dij Sen dwk paenqdix, ya puj chaej. ¹² Sowh gau tang'vaenz lai doangh naeh, sipngih goanz dij goanz zawxkauq Yezsuz maz daj Yezsuz hax: "Inxnaeh zawh ndaw doanghmowz, hawj paenqdix dungzbyaeg ej, hoakzaqnaeh hawj paenqdix mwz le longq haenzhenz inxnaeh cha dih ndowj, cha gaenqjin." ¹³ Yezsuz hax: "Gaenqsu aeu gaenqjin hawj paenqdix jin mah!" Paenqdix yaeng: "Gaenqpiu zux miz haj aen binx daj song do bya, jixzawh mboq mwz swx gaenqjin tem mboq doh goanz lai baenzaqnaeh jin." ¹⁴ Zwz naeh, suanq gaj puj zaiz zoq miz teq haj tiang goanz ux naeh. Yezsuz daj cohsaenz dix hax: "Yaix paenqdix hoak boangx hoak boangx naengh, boangx ux teq hajsip goanz ux naeh." ¹⁵ Cohsaenz zoq biak kauq dix bae hoak, yaix daengzle naengh. ¹⁶ Yezsuz gaem haj aen binx daj song do bya, ngangh to lez mwz ndaw fax, mbaiq dij Sen, peg binx daj dij bya, yenh hawj cohsaenz dix, aeu hawj daengzle. ¹⁷ Daengzle gaj goanz gaj jin imq, gaenq low zaep ndaej sipngih ka choiq.

Bihdowh Hax Yezsuz Zawh Jizduz

¹⁸ Miz mbaed ux, sowh gau Yezsuz goanzdoag haeggaj daj dij Sen hax kauq naeh, cohsaenz dix daeq maz henz dix, dix cham paenqdix: "Daenh hax gux zawh gawz?" ¹⁹ Paenqdix yaeng: "Mbangj goanz hax mawz zawh Yezhanq goanz saeh daenh hoak diauq zauh soi q naeh, mbangj goanz hax mawz zawh Yixliqyaq, mbangj goanz hax mawz zawh zwzpujjeq puj zawxkauq dij Sen goanz ux daeuq

zaeu." ²⁰ Dix daeuq cham paenqdix: "Gaenqsu hax gux zawh gawz?" Bihdowh yaeng: "Zawh goanz dij Sen aeu hoak Jizduz naeh!" ²¹ Yezsuz saengq paenqdix laek aeu mbaed saeh naeh haxdoq gawz. ²² Daeuq hax: "Gux Lug Dij Goanz ndaej jinkaem taeuq zuxbaenz. Mwnaj sowh puj saeq gvanx puj Yaeuhtaiq naeh, sowh goanz gvanx puj mbud dij Sen naeh, sowh lauxswz zau *Sw Dij Sen* naeh, paenqdix viangh gux, kaj gux, vaenz daih sam gaenqgux zux daeuq zaeu."

²³ Yezsuz daeuq daj daengzle hax: "Jixzawh gawz zawx nowngz gux, zoq aeu gaenq gux nyaengx daekgoanq, aeu gaenq hoakri nyaengx doaklaeng, vaenz vaenz baz maexngamzchaz hoakri maz nowngzlaeng gux. ²⁴ Gawz zawx jeuq aen mingh dihndin naeh, gawz zoq laem aen mingh daengznauq naeh. Gaj jixzawh gawz zawh cholaeng gux viangh aen mingh dihndin naeh, gawz zoq jeuq ndaej aen mingh daengznauq naeh. ²⁵ Jixzawh dij goanz gawz ndaej daengz dawjfax nauq, gaj dix zawh aeu aen mingh dix bae lwh, hoakzaqnaeh daengz ndaej goj bowhbowh ndaej. ²⁶ Gannaeh gawz aeu gux daj kauq gux hoak gaenq laizlom, mwnaj gux Lug dij Goanz miz najta hoakri, miz najta Dez ndaw fax, miz najta boangx bin dij Sen naeh loangz daeuj zwzrawz, gux goj aeu dix hoak gaenq laizlom. ²⁷ Gux haxdoq su swhlit: in yuq inxnaeh, miz dij goanz naengz mboq tai rux ndaej taen goh dij Sen."

Yezsuz Yuq Ndaw Bo Byenq Rungh Taeuq

²⁸ Gvaq hax suq kauq naeh ndaej teq biad vaenz ux naeh yaq, Yezsuz zowz Bihdowh, Yezhanq daj Yaqgowh mwz ndaw bo daj dij Sen hax kauq. ²⁹ Gau Yezsuz daj dij Sen hax kauq naeh, naj dix byenq, rux rungh daj tang'vaenz dungzlumj, sowj dix rux rungh, lownq taeuq. ³⁰ Sowh gau naeh, cohsaenz Yezsuz faekfongh daeh leztaen Moahciz daj Yixliqyaq, doiqnaeh daj Yezsuz laemhkauq,ⁿ ³¹ doiqdix yuq ndaw ngauez dij Sen, laemh gaenq saeh Yezsuz tai naeh, zoq zawh gaenq dix zaekgaj yuq Yezluqsaxlaengx hoak nauq naeh. ³² Bihdowh daj dungzbowh dix tainoanz, saek ngut saek ngaenh. Paenqdix jinh yaq, leztaen Yezsuz rungh rowngzfwk, leztaen song goanz daj dix zaemh in naeh. ³³ Gau song goanz daz ni dix naeh, Bihdowh daj Yezsuz hax: "Lauxswz, gaenqpiu yuq inxnaeh ndae zae! Gaenqpiu daengj sam aen zangjpungh, aen ux hawj mawz, aen ux hawj Moahciz, aen ux hawj Yixliqyaq." Dix mboq ruxndeq hoakri dix hax gaeng. ³⁴ Gau dix hax gaemz kauq naeh, miz kvaix pajfax ux maz yaz paenqdix, paenqdix ndonj mwz ndaw pajfax. Cohsaenz gaj goanz gaj mbu. ³⁵ Miz hiang kauq daeq ndaw pajfax daeuj, hax: "Dix zawh lug zaiz gux, zawh gaenqgux lowg, gaenqsu yauq biak dix!" ³⁶ Hiang kauq mwz rawz yaq, Yezsuz goanzdoag dix haeggaj yuq dih naeh. Le vaenz gaengnaeh, cohsaenz mboq daj gawz laemh suq saeh paenqdix leztaen naeh.

ⁿ9:30 Moahciz daj Yixliqyaq, doiq naeh zawh zwzpujjeq puj zawxkauq dij Sen. *Moahciz* mai fahlidij dij Sen, *Yixliqyaq* hoak sowh saenh yaengh saenh naeh. Lez Sw Ni Aizjih, Sw Laux hongz Bwnz Daih Aet Naeh, Sw Laux hongz Bwnz Daih Ngih Naeh

Yezsuz Saeh Maeng Ux Daem Dij Pi Ni

³⁷ Vaenzlaeng, paenqdix daeq ndaw bo daeuj, miz yaengh boangx goanz daeq maz doq Yezsuz. ³⁸ Boangx goanz naeh miz goanz ux caqsiq rongx: "Lauxswz, vanz mawz saeh maeng lug zaiz gux mbaed'ux, gux zux mizgaj maeng lug zaiz doag naeh. ³⁹ Dij pi daeh jenj dix, dix zoq daeh rongx, yaq saenq rowdrowd, ndaw baeg miz fogfauz. Dij pi nyuk dix bae dauh bae dauh, damz zwzzwz jenj dix. ⁴⁰ Gux vanz cohsaenz mawz daem dij pi ni, gaj paenqdix hoak mboq taeng." ⁴¹ Yezsuz hax: "Aeh! Dij goanz zoh su gannaeh yaeuq mbowq yaeuq mboq sinq dij Sen ah! Gux haeuz daj su zaemh yuq ndowj baenzaqnaeh, gaenqsu naengz mboq sinq. Gaenqsu daz hawj gux daj su zaemh yuq taeng zwzrawz mux? Gux gaemx su taeng zwzrawz mux?" Yaq Yezsuz daj dez maeng gaengnaeh hax: "Zowz lug zaiz mawz maz dih gux inxnaeh ndeh." ⁴² Gau maeng lug gaengnaeh daeq maz naeh, dij pi hawj dix laemx, hawj dix saenq rowdrowd. Yezsuz hwt do pi naeh, ya maeng lug naeh ndae, aeu dix hawj dez maeng gaengnaeh. ⁴³ Daengzle menq sawz menq zaemz doakriangz dwx dij Sen.

Yezsuz Mbaed Daih Ngih Hax Dix

Rux Tai Yaq Daeuq Zaeu

Gau daengzle menq sawz menq zaemz suq saeh naeh, Yezsuz daj cohsaenz dix hax: ⁴⁴ "Gux Lug Dij Goanz mwznaj zoah aeu hawj daenh. Su aeu gaemz naeh nyaengx zaw." ⁴⁵ Dij Sen mboq hawj cohsaenz ruxndeq, hoakzaqnaeh paenqdix mboq

ruxndeq gaemz kauq naeh hax gaeng, paenqdix goj mboq ganz cham.

Cohsaenz Dungzjinj Zawh

Gawz DwX Nyeuz Daengzle

⁴⁶ Cohsaenz dungzjinj yuq goh dij Sen paenqdix zawh gawz dwx nyeuz daengzle.^o ⁴⁷ Yezsuz ruxndeq paenqdix nwh gaeng, zoq zowz maz goanz lug eng ux, hawj dix yuq haenz hoakri in. ⁴⁸ Dix daj cohsaenz dix hax: "Nanghgaj gawz cho zwh gux ej doiq goanz lug eng inxnaeh ndae, zoq zawh doiq gux ndae. Nanghgaj doiq gaenggux ndae, zoq zawh doiq laux nemz gux daeuj naeh ndae. Gaenqsu gawz hoak puj ix nyeuz gawz zoq baenz puj dwx nyeuz daengzle." ⁴⁹ Yezhanq hax: "Lauxswz, gaenqpiu leztaen miz goanz ux aeu zwh mawz daem dij pi, gaj gaenqdix mboq daj piu nowngz mawz, piu zoq daet dix, mboq hawj dix hoak." ⁵⁰ Yezsuz hax: "Laek daet dix, unj, gawz mboq daet su, gawz zoq zawh daj su zaemh baih."

Dij Goanz Saxmaxliqyaq Mboq Zaemz Yezsuz

⁵¹ Zaekgaj taeng vaenz Yezsuz zoah raep mwz ndaw fax naeh, dix zoq mwz Yezluqsaxlaengx, mwz hoanhhoanh. ⁵² Dix yaix dij goanz mwz daekgoanq dix, sowh dij goanz dix yaix mwz naeh mwz taeng mbanj Saxmaxliqyaq longq ux, dox dih ndowj taj dix. ⁵³ Yezsuz daeq mwz baih Yezluqsaxlaengx, mwz hoanhhoanh, baenzaqnaeh dij goanz Saxmaxliqyaq mboq zaemz dix. ⁵⁴ Cohsaenz dix Yaqgowh, Yezhanq leztaen yaq, zoq hax: "Zaeuj aj, mawz hawj piu yaix faez daeq ndaw fax loangz

daeuj pyaeu paenqdix lown nauq vah?" ⁵⁵ Yezsuz ueq dauh laeng hwt doiqdix. ⁵⁶ Dij goanz dihnaeh mboq zaemz paenqdix, paenqdix zoq mwz longq ndai.

Miz Dij Goanz Vanz Yezsuz

Hawj Paenqdix Nowngz Dix

⁵⁷ Gau paenqdix daeq loh naeh, miz goanz ux daj Yezsuz hax: "Daengz mawz mwz rawz, gux goj nowngz mawz!" ⁵⁸ Yezsuz hax: "Ma'bo miz ruz ndowj, dij noag miz mungx ndowj, gaj gaenqgux Lug Dij Goanz lej daengz dih bomj naengz mboq miz neh." ⁵⁹ Yezsuz daj puj ndai goanz ux hax: "Mawz maz nowngz gux." Goanz naeh hax: "Zaeuj aj, hawj gux dauh mwz rownz taj mwznaj gux moak dez gux ndae'ndowq yaq, gux goanq daeuj nowngz mawz." ⁶⁰ Yezsuz hax: "Hawj sowh puj zaw haeuz tai naeh haeggaj moak puj tai paenqdix ndae'mah, mawz aeu kauqfaengz dij Sen bae koanx dwk daenh." ⁶¹ Daeuq miz goanz ux hax: "Zaeuj aj, gux venq nowngz mawz, gaj hawj gux dauh mwz daj ndaw rownz dungzbyaeg goanq." ⁶² Yezsuz hax: "Mungz gaem gaenz tae, ta lez bae baihlaeng, sowh dij goanz naeh mboq paeq yuq Goh dij Sen kvej."

Yezsuz Nemz Jiatsip-ngih Goanz Og Bae

10 ¹ Gvaq mbaed saeh naeh yaq, Zaeuj daeuq lowg jiatsip-ngih goanz mawq og bae, yaix paenqdix song goanz song goanz bae dih ux, bae sowh dih mwznaj hoakri dix bae naeh, mbangj dih zawh ndaw chaenh, mbangj dih zawh ka'mowngz.

² Yezsuz daj paenqdix hax: "Kaeujpyaek baenz caeu lai taeuq, gaj puj caeu miz goanz ix gvaq, baenzaqnaeh su baenz vanz zaeuj raeh do nemz puj caeu bae caeu kaeujpyaek dix. ³ Gaenqsu bae ndeh, gux nemz gaenqsu bae, daj hawj dij mbej ix bae jeh dij ma'naez dungzlumj. ⁴ Laek laep jenz, laek laep daeh, laek laep haiz, laek yuq ka loh dongx daenh. ⁵ Mwz rownz gawz gojndae, hoakzaqnaeh dongx daenh daekgoanq: 'Ngwz daengz rownz mawz yuq vangqdangh!' ⁶ Jixzawh dihnaeh miz dij goanz paeq ndaej yuqvangq, gaemz gaenqsu dongx paenqdix naeh zoq byenqbaenzaeh, jixzawh rownz gawz doiq su mboq ndae, gaemz gaenqsu dongx paenqdix naeh zoq mboq baenzaeh. ⁷ Hoakgaengx hoj ndaej vaenzriangz, baenzaqnaeh, su yuq rownz gawz ndowj, jin gaenq rownz dix aeu hawj naeh. Yuq rownz gawz ndowj zoq yuq rownz gawz ndowj, laek daeq rownz naeh ban bae rownz naeh. ⁸ Mwz longq rawz gojndae, jixzawh daenh zaemz su, aeu gaenqjin hawj su jin, daenh baiz gaeng, su zoq jin gaeng. ⁹ Ya puj chaej ndaw longq dix, daj paenqdix hax: 'Goh dij Sen zawj su yah.' ¹⁰ Mwz longq rawz gojndae, jixzawh longq rawz mboq miz goanz hawj su ndowj, su zoq bae zang longq, ¹¹ hax: 'Daengz sowh mowdmoanz longq su sowh biad din piu naeh, piu goj yuq doqnaj su jiat ni. Gaj su ruxndeq zuxbaenz: Goh dij Sen daeuj zawj yah.' ¹² Gux haxdoq su, vaenz dij Sen saenxpanq dij goanz naeh, sowh longq naeh zoq zoah yah, naengz zoah naek nyeuz ndaw Soaxdozmax."^P

Yezsuz Hwt Sowh Longq Mboq Gaix Naeh

¹³ "Longq Goazlalcunq aj, mawz zoah yah! Longq Boahsaiqdaq aj, mawz zoah yah! Unj, sowh saenh yaengh saenh yuq dih su hoak naeh, jixzawh zwz naeh yuq ndaw chaenh Taiq'ex daj ndaw chaenh Cizdunq hoak, paenqdix naengz rux naengh daeuj dihndin, aeu paeng mae'banq baz, aeu mowdmoanz sauq mwz to, gaix ndowj yaq eh. ¹⁴ Taeng vaenz dij Sen saenxpanq dij goanz naeh zwzrawz, gaenqsu naengz zoah naek nyeuz aen chaenh Taiq'ex daj aen chaenh Cizdunq. ¹⁵ Longq Zazbowhnungh aj, mawz mboq rux ndaej mwz ndaw fax, mawz ndaej bae dihndaem mboqyaq." ¹⁶ Yezsuz daj jiatsip-ngih goanz gaengnaeh hax: "Gawz biak gaenqsu zoq zawh biak gux, gawz mboq biak gaenqsu zoq zawh mboq biak gux, gawz mboq biak gux zoq zawh mboq biak laux nemz gux daeuj naeh."

Jiatsip-ngih Goanz Gaengnaeh Dauh Maz

¹⁷ Jiatsip-ngih goanz gaengnaeh faengzfaengz nyauznyauz dauh maz, daj Yezsuz hax: "Zaeuj aj, gaenqpiu aeu zwh mawz nemz dij pi, dij pi zoq daeq ndaw ndang dij goanz og daeuj. Daengz dij pi naengz biak piu." ¹⁸ Yezsuz hax: "Gux leztaen Sazdanz daj faxmyaeb dungzlumj daeq ndaw fax doak daeuj. ¹⁹ Gux haeuz aeu qenhliq hawj su, hawj su nditnduj dij nguz daj cezzwx ndaej,⁹ hawj su bex daengzle sowh doakriangz do daj raeuz hoak dangqbaih naeh, toj mboq rux miz gaeng hawj su baenzrawz. ²⁰ Gaenqsu laek cholaeng dij pi biak

su zoq faengz, yauq cholaeng minxzwh su mai nyaengx ndaw fax ej faengz."

Yezsuz Faengz Taeuq, Biangz Dez Ndaw Fax

²¹ Sowh gaunaeh, Minghkoan dij Sen hawj Yezsuz faengz taeuq. Yezsuz zoq hax: "Dez aj, Zaeuj ndaw fax daj dihndin, gux biangz mawz! Unj mawz aeu sowh saeh naeh gowx puj miz aen gvai daj puj miz aen dongx, gaj mawz hawj lug eng taen, ruxndeq. Dez aj, zawh zaeh, mawz ngaiq hoakzaqnaeh hoak. ²² Dez gux haeuz gaeng goj aeu hawj gux, mizgaj dez gvaqmaz mboq miz gawz ruxndeq lug zawh gawz, mizgaj lug daj sowh puj lug hawj dix ruxndeq naeh gvaqmaz mboq miz gawz ruxndeq dez ndaw fax zawh gawz." ^{23–24} Yezsuz ueq dauh maz, daj gaj cohsaenz dix hoakzaqnaeh hax: "Gawz ndaej taen sowh gaeng su leztaen naeh, gawz faengz yah! Gux haxdoq su, koax daekgoanq miz puj zawxkauq dij Sen daj puj hoak hongz lai taeuq, zawx taen sowh gaeng su taen naeh, gaj mboq ndaej taen, zawx ruxnyinz sowh gaeng su ruxnyinz naeh, gaj mboq ndaej ruxnyinz. Gawz ndaej taen sowh gaeng naeh, gawz faengz yah!"

Gawz Zawh Dungzbowh Gux

²⁵ Sowh lauxswz aeu *Sw Dij Sen* zau daenh naeh miz goanz ux dwnq maz daeg Yezsuz, dix hax: "Lauxswz, gux hoj hoak gaeng zux rux ndaej aen mingh daengznauq naeh mux?" ²⁶ Yezsuz daj dix hax: "Fahlih Moahciz mai naeh hax gaeng mux? Mawz doag yaq hoakzaqrawz nwh mux?" ²⁷ Dix

⁹**10:19** Cezzwx lumj mehmungxqingqchau, gaj dix aeu tang dix ndaed, ndaed chaej taeuq, mbangj zwz rux ndaed hawj dij goanz tai.

yaeng: "Hoakzaqnaeh mai: 'Mawz aeu daengz zaw, daengz mingh, daengz doakriangz, daengz aen og, ngaiq dij Sen laux zaeuj mawz naeh.'^rGoj hoakzaqnaeh mai: 'Nwh puj hoakri daj nwh hoakri dungz lumj.'"^s ²⁸ Yezsuz yaeng: "Mawz yaeng ndaej hoj, mawz hoakzaqnaeh hoak, mawz zoq ndaej aen mingh daengznauq naeh." ²⁹ Goanz gaengnaeh zawx hawj daenh ruxndeq hoakri dix miz lix, zoq daj Yezsuz hax: "Sowh dij goanz rawz zux suanq zawh puj hoakri gux?" ³⁰ Yezsuz laemh diauq naeh yaeng dix: "Miz goanz ux daeq Yezluqsaxlaengx bae Yezliqgoz, doanhloh mex zoah puj laek, puj laek longx ndangnungh dix, dup dix zaekgaj tai zoq ni dix, jizzaz dix. ³¹ Saeb sangz miz goanz puj mbud dij Sen ux gvaq zoah haenz dix, leztaen dix, gaj dix yumq ni bae. ³² Daeuq miz goanz puj Liqvaeq ux gvaq zoah haenz dix,^t leztaen dix, goj yumq vaenx ni bae. ³³ Mizgaj goanz puj Saxmaxliqyaq ux gvaq zoah haenz dix,^u leztaen dix, zoq zawchaej dix, ³⁴ daeq mwz aeu yuz daj laeujya daz dih chaej dix, toq ndae yaq, luz dix kviq doihdo hoakri, zowz dix mwz lixcowq, zauzhuz dix. ³⁵ Vaenzlaeng, dix aeu song downnah ngaenz hawj rownz lixcowq naeh, daj zaeujrownz naeh hax: 'Vanz mawz zauzhuz dix, jixzawh jenz inxnaeh mboq doh, gux dauh daeuj zwzrawz gux daeuq aeu boiz mawz mboqyaq.'" ³⁶ Yezsuz daeuq daj goanz gaengnaeh hax: "Mawz nwh, sam goanz naeh, zawh gawz aeu goanz zoah

puj laek dup naeh hoak puj hoakri mux?" ³⁷ Dix yaeng: "Zawh goanz zawchaej dix naeh." Yezsuz hax: "Mawz goj zaemh bae hoakzaqnaeh hoak ndeh."

Doiq Bihongx Nyingz Maxdaq Daj Maxliqyaq

³⁸ Gau paenqdix goq daeq daeq naeh, Yezsuz ndonj mwz longq ux, miz goanz nyingz ux, minxzwh rongx hoak Maxdaq, qingj Yezsuz mwz rownz dix. ³⁹ Maxdaq miz goanz nongx nyingz ux, minxzwh rongx hoak Maxliqyaq. Maxliqyaq naengh yuq haenz din Zaeuj biak dix zau. ⁴⁰ Maxdaq baeuh gvaq, miz lai yowngh baenz kvej taeuq, ndaw zaw nyungj, zoq maz daj Yezsuz hax: "Zaeuj aj, nongx gux jizzaz gux haeggaj kvej, mawz mboq miz raeng rah? Vanz mawz yaix dix maz saeh gux mah." ⁴¹ Zaeuj yaeng dix: "Maxdaq, Maxdaq. Mawz cho lai yowngh mboq vangq, cho lai yowngh huangz, ⁴² gaj zux miz yowngh ux baenz hoak mboqyaq, Maxliqyaq haeuz lowg zoah yowngh ndae nyeuz daengzle naeh, mboq miz gaeng daet dix ndaej."

Vanz Gaeng Zoq Ndaej Gaeng

11 ¹ Miz vaenz ux, Yezsuz yuq dih ux daj dij Sen hax kauq, hax gah yaq, miz goanz cohsaenz ux daj dix hax: "Zaeuj aj, vanz mawz zau piu hoakrawz daj dij Sen hax kauq, hoakzaq Yezhanq

^r10:27 Gaemz kauq naeh haeuz yuq Sw Fahlih Daih Ngih Naeh 6:4-5.

^s10:27 Gaemz kauq naeh haeuz yuq Sw Liqvaeq 19:18, 34.

^t10:32 Dij *goanz puj Liqvaeq* zawh luglan Liqvaeq; zwzpujjeq dij Sen hawj paenqdix yuq Rownz dij Sen kvej. Lez ndaw Sw Ni Aizjih 28:1.

^u10:33 *Puj Saxmaxliqyaq* daj puj Yaeuhtaiq mboq dungzhoj.

zau cohsaenz dix naeh." ² Yezsuz hax: "Gaenqsu daj dij Sen hax kauq gaurawz, hoakzaqnaeh hax:

"Dez aj, ngwz dij goanz gaj goanz gaj zaemz mawz,

yinq mawz zawh dij Sen dwx nyeuz daengzle naeh.

Ngwz mawz daeuj gvanx daengzle nauq.^v

³ Gaenqjin gaenqpiu, vanz mawz gaj vaenz gaj aeu hawj piu.

⁴ Vanz mawz yangq gaenq hoakloang piu, hoakzaq gaenqpiu yangq nij daenh naeh.

Laek hawj gaeng coak piu."^w

⁵⁻⁶ Yezsuz daeuq daj paenqdix hax: "Jixzawh mawz miz goanz dungzbownh gvae ux byonghhwnz maz zawj mawz, mawz yowngh aeu gaeng baiz hawj dix jin mboq miz, mawz zoq bae rownz dungzzawj daj dix jeq sam aen binx. ⁷ Goanz rownz dungzzawj naeh hoakzaqnaeh yaeng: "Laek mahfanh gux, rownz gux haeuz ngaemz du yaq, lug eng goj haeuz daj gux noanz ndaw tanj yaq, gux dwnq aeu hawj mawz mboq baenz eh." ⁸ Gaj gux haxdoq su, daengz dix mboq cholaeng daj mawz zawh dungzbownh ej aeu hawj mawz, goj cholaeng mawz aen laizlom mboq zauh vanz ej aeu hawj mawz. ⁹ Gux haxdoq su, vanz dij Sen goj zawh baenzaqnaeh. Gaenqsu yauq vanz dij Sen oaj, gaenqsu vanz, dij Sen zoq aeu hawj su; gaenqsu yauq cha oaj, gaenqsu cha, dij Sen

zoq hawj su cha taen; gaenqsu yauq rongx aj du oaj, gaenqsu rongx aj du, dij Sen zoq aj du hawj su. ¹⁰ Unj gawz vanz, dij Sen zoq aeu hawj gawz, gawz cha, dij Sen zoq hawj gawz cha taen, gawz rongx aj du, dij Sen zoq aj du hawj gawz. ¹¹ Gaenqsu sowh puj hoak boh naeh, jixzawh lug zaiz su cham su aeu dij bya, su rux aeu dij nguz miz duh dang dij bya hawj dix mah? ¹² Lug cham aeu chaeq, su rux aeu sowh cezzwx miz duh naeh hawj lug maj? ¹³ Daengz gaenqsu mbowq, su naengz ruxndeq aeu gaenq ndae hawj lug, Dez ndaw fax, hoakrawz mboq aeu Minghkoan dix hawj sowh dij goanz vanz dix naeh mux!"

Yezsuz Kauq Doakriangz Dij Sen Daem Dij Pi

¹⁴ Yezsuz daem do pi ux og daeuj, do pi naeh hawj dij goanz mboq rux hax kauq, do pi naeh og daeuj yaq, goanz mboq rux hax kauq naeh zoq rux hax kauq, daengzle menq sawz menq zaemz. ¹⁵ Gaj goj miz dij goanz hax: "Dix zawh maengx Behcizbuq do gvanx dij pi naeh daem dij pi."^x ¹⁶ Daeuq miz goanz maz daeg Yezsuz, hawj dix hoak sowh saeh ndaw fax naeh. ¹⁷ Yezsuz ruxndeq paenqdix nwh gaeng, ruxndeq paenqdix zawh daeg dix, zoq daj paenqdix hax: "Aen goh ux jixzawh ndaw dix haeggaj dungzjeng, aen goh naeh toj lown mboqyaq. Rownzgoanz ux jixzawh ndaw rownz gaj vaenz gaj haeggaj dungzjeng, rownz naeh zoq dungzbyaeg mboqyaq. ¹⁸ Gaenqsu hax gux zawh kauq Behcizbuq do gvanx dij pi naeh naeh daem dij

^v11:2 Sw Maxtaiq 6:10 miz gaemz naeh: *Ngwz gaenq mawz daz naeh yuq dihndin baenz zaeh, hoakzaq yuq ndaw fax naeh baenz zaeh.*

^w11:4 Sw Maxtaiq 6:13 miz gaemz naeh: *Jeuq piu ni do mbowq tai mbowq naeuh gaengnaeh.*

^x11:15 Sazdanz do gvanx dij pi naeh daenh goj rongx dix hoak **Behcizbuq**.

pi. Gaj jixzawh Sazdanz haeggaj daj hoakri mboq dungzhoj, haeggaj dungzbyaeg, goh dix zoq gaemx mboq ndowj gajrawz yah! ¹⁹ Jixzawh gux zawh kauq Behcizbuq daem dij pi, haenx, sowh puj nowngz su naeh goj zawh kauq Behcizbuq daem dij pi lox? Su hoakzaqnaeh hax gux, su goj hax zoah sowh puj nowngz su naeh. Hoakzaqnaeh, sowh puj nowngz su naeh haeggaj rux hax su mboq hoj. ²⁰ Jixzawh gux zawh kauq doakriangz dij Sen daem dij pi, zoq zawh hax goh dij Sen haeuz daeuj taeng zawj su, dij Sen haeggaj gvanx dij goanz dix yah. ²¹ Sazdanz daj goanz puj zaengx ux dungzlumj, dix gaem gaenq dungzsaeh dawz rownz dix, hawj za'hoq rownz dix mboq baenzrawz. ²² Gaj gux goanz riangz nyeuz dix naeh maz saeuh dix, saeuh bex dix, longx gaenq dungzsaeh dix maengx naeh, longx za'hoq dix bae baen hawj daenh. ²³ Gawz mboq zawh daj gux zaemh hoak, gawz zoq zawh dix gux. Gawz mboq nowngz gux zaemh caeu dij mbej, gawz zoq zawh daem dij mbej ni.

²⁴ "Gux haxdoq su, dij pi ni ndang dij goanz og daeuj zwzrawz, dix zoq laq dih kawq cha dih ndowj, jixzawh cha mboq mex, dix zoq hax: 'Gux daeuj dauh mwz aen rownz mbaednduq gux ndowj naeh.' ²⁵ Dix mwz taeng aen rownz mbaednduq, leztaen ndaw rownz haeuz gvaed sawrik, baiz singjringh. ²⁶ Dix zoq bae zowz maz jiat do pi zaemh ndowj, jiat do naeh naengz mbowq nyeuz dix. Doaklaeng goanz gaengnaeh gajfa zoah naek nyeuz mbaednduq."

Sowh Dij Goanz Rawz Zux Faengz

²⁷ Gau Yezsuz hax kauq naeh, boangx naeh miz goanz nyingz ux caqsiq daj dix hax: "Yah baz mawz, yah zowngx mawz naeh faengz yah!" ²⁸ Yezsuz hax: "Gaj naengz mboq ndeu sowh goanz biak kauq dij Sen bae hoak naeh faengz!"

Yezsuz Hwt Sowh Puj Zawx Lez

Gaj Sowh Saeh Ndaw Fax Naeh

²⁹ Gau daengzle goq maz maz haenz dix naeh, Yezsuz hax: "Zoh naeh mbowq taeuq, zawx lez gaj sowh saeh ndaw fax naeh, gaj mizgaj gaenq hoak bae nowto Yeznah goanz puj zawxkauq dij Sen naeh,* gvaqmaz mboq rux hoak sowh saeh ndaw fax naeh yownggh ndai tem hawj su lez yah. ³⁰ Zwz naeh dij Sen nemz Yeznah saengq dij goanz Nihnihvaez, gannaeh dij Sen nemz gux Lug Dij Goanz saengq zoh zawjraeuz. ³¹ Zwzndowj, miz goanz nyingz ux gvanx Seqbaz goh, dix ruxnyinz laux hongz Soaxloahmaenh miz aen gvai, miz aen dongx, dix zoq daeq gvae maz biak kauq laux hongz Soaxloahmaenh. Su lez, inxnaeh miz goanz ux naengz dwx nyeuz laux hongz Soaxloahmaenh, gaj zoh dij goanz su gannaeh mboq biak dix. Hoanx naeh dij Sen saenxpanq dij goanz zwzrawz, goanz nyingz gaengnaeh toj hax zoh dij goanz gannaeh mboqyaq, hax gaenq loang paenqdix. ³² Dij goanz Nihnihvaez biak kauq Yeznah yaq zoq gaix. Su lez, inxnaeh miz goanz ux naengz dwx nyeuz Yeznah, gaj su mboq biak. Dij Sen saenxpanq dij goanz

*11:29 Yeznah 1:17; 2:10.

zwzrawz, dij goanz Nihnihvaez hax zoh dij goanz gannaeh mboqyaq, hax gaenqloang paenqdix.

Aeu Hoakri Hoak Daj Daeng Dungzlumj

³³ "Mboq miz gawz diamj daeng yaq aeu daeng gowx bae dihndai rux aeu choiq gumq, dix toj aeu daeng nyaengx now zongz, hawj sowh dij goanz ndonj maz naeh lez taen. ³⁴ Ta mawz zoq zawh aen daeng ndang mawz, ta mawz ndae'ndowq, daengz ndang zoq rungh. Jixzawh ta mawz mboq ndae, daengz ndang zoq ndaem. ³⁵ Baenzzaqnaeh yauq caqsiq hem, yaj hawj gaenqrungh ndaw ndang mawz byenqbaenz gaenqndaem. ³⁶ Jixzawh mawz daengz ndang rungh, mboq miz saek dit ndaem, mawz zoq rungh nauq, daj sowh daeng rungh zauq daeuj ndang mawz naeh dungzlumj."

Yezsuz Hwt Dij Goanz Fahliqsaiq Daj Sowh Lauxswz Zau Sw Dij Sen Naeh

³⁷ Gau Yezsuz hax kauq naeh, miz goanz Fahliqsaiq ux qingj Yezsuz daj dix zaemh jinkaueuj, Yezsuz zoq ndonj mwz naengh zongz. ³⁸ Goanz Fahliqsaiq naeh leztaen Yezsuz naengz mboq soiq mungz zoq jinkaueuj, dix zoq sawz taeuq. ³⁹ Zaeuj daj dix hax: "Dij goanz Fahliqsaiq su daj sowh dij goanz langx gaj baihnog baedvanq sawrik naeh dungzlumj, gaj ndaw su mizgaj gaenq maeux daj gaenqndog. ⁴⁰ Puj uaj aj, laux chauq baihnog naeh goj chauq baihindaw. ⁴¹ Jixzawh su mizzaw saeh puj baenzluk, soiq mungz rux mboq soiq mungz, suq su hoak naeh, gaeng dij Sen goj hax hoj. ⁴² Dij goanz

Fahliqsaiq aj, gaenqsu zoah yah! Gaenqsu aeu pyaek'aeux, pyaekjizzongz daj pyaek yowngh ndai, sip gong aeu gong ux hawj dij Sen, le gaenqnaeh goj baenz hoak zaeh lox, gajlej gaenqsu baenzrawz hoak saeh tw mboq piang, mboq ngaiq dij Sen? Le gaenqnaeh zungqyauq nyeuz, gaenqsu hoak zuxbaenz. ⁴³ Dij goanz Fahliqsaiq aj, gaenqsu zoah yah! Gaenqsu ngaiq yuq rownzndawcowq naengh aen sung nyeuz daengzle naeh, gaenqsu ngaiq yuq hangzhw hawj daenh goakdwk su. ⁴⁴ Gaenqsu zoah yah! Gaenqsu daj sowh mohbujreuh mboq miz boi, mboq myeanz maz naeh dungzlumj, dij goanz daeq bae now dix goj mboq ruxndeq dawj dix miz puj tai."^y

⁴⁵ Sowh lauxswz aeu *Sw Dij Sen* zau daenh naeh miz goanz ux yaeng Yezsuz: "Lauxswz, mawz hoakzaqnaeh hax, mawz goj haxmbowq daengz piu!" ⁴⁶ Yezsuz hax: "Sowh lauxswz aeu *Sw Dij Sen* zau daenh naeh, gaenqsu zoah yah! Gaenqsu aeu taeb naek hawj daenh tw, gaj hoakri su dit doakriangz rawz goj mboq saeh. ⁴⁷ Gaenqsu zoah yah! Gaenqsu hoak mohbujreuh puj zawxkauq dij Sen, sowh puj zawxkauq dij Sen naeh paenqdix zawh puj jeq rownz su kaj. ⁴⁸ Puj jeq rownz su kaj puj zawxkauq dij Sen, gaenqsu hoak mohbujreuh puj zawxkauq dij Sen, gaj gaenqsu mboq biak kauq paenqdix, gaenqsu hoakzaqnaeh zawh hax puj jeq rownz su hoak hoj. ⁴⁹ Baenzzaqnaeh dij Sen gaeng goj ruxndeq naeh, ndaej hoakzaqnaeh hax: 'Gux nemz puj zawxkauq gux daj sowh dij goanz aeu kauq gux bae koanx dwk daenh naeh bae dih paenqdix

^{y11:44} Puj Yaeuhtaiq hax jixzawh gawz lumh zoah puj tai, do tai, gawz mboq byenqbaenz mboq saw, le vaenz gaengnaeh zoq mboq ndaej mwz rownz dij Sen.

naeh, mbangj goanz zoah paenqdix kaj, mbangj goanz zoah paenqdix vazkuz.^{50–51} Hoakzaqnaeh, daeq chauq fax chauq dihndin maz, daeq zwz Yaqboah zoah kaj naeh maz, taengdeg Saxzazliqyaq yuq jinghzang aen zongz mbud dij Sen daj rownz dij Sen naeh zoah daenh kaj naeh, nanghgaj zawh kaj puj zawxkauq dij Sen, gaenqloang naeh, lowd paenqdix, zoh dij goanz naeh tw.⁵² Sowh lauxswz aeu *Sw Dij Sen* zau daenh naeh, gaenqsu zoah yah! Gaenqsu aeu jezsaq bae gowx, zoq zawh jezsaq aj baegdu hawj dij goanz ruxndeq gaenq dij Sen naeh, hoakri gaenqsu mboq ndonj mwz, daengz sowh puj zawx ndonj mwz naeh gaenqsu goj dingz paenqdix."⁵³ Yezsuz daeq dih gaengnaeh og daeuj, sowh lauxswz zau *Sw Dij Sen* naeh daj dij goanz Fahliqsaiq dix dix taeuq, paenqdix ngwz Yezsuz hax kauq loang, zoq cham yowngh cham yowngh,⁵⁴ daz hawj dix cho kauq dix baenzsaeh.

Hem Fahfaenx Dij Goanz Fahliqsaiq

12¹ Zwz naeh, dij goanz maz haenz Yezsuz baenz tiang baenz fanh, dik daengz goanz lej nyanx zoah goanz saw. Yezsuz daj cohsaenz dix hax: "Gaenqsu hem fahfaenx dij goanz Fahliqsaiq ixux, paenqdix baeg daj zaw mboq dungzljumj, laek hawj paenqdix biad zoah.² Gaeng gojvenj, daengz aeu yaz ndae gajrawz goj rux miz dij goanz taen, gaeng goj venj, daengz aeu gowx ndae gajrawz goj rux miz dij goanz ruxndeq.³ Baenzzaqnaeh, sowh gaenq su mbuhmbih mbuhmbih naeh, mwznaj toj miz goanz lai ruxnyinz mboqyaq, sowh gaenq su yuq ndaw ruk supsaeb naeh, mwznaj toj miz dij goanz yuq nyiangzrownz caqsiq hax og daeuj mboqyaq."

Hoj Mbu Gawz

⁴ "Boangx dungzbownh aj, gux haxdoq su, sowh puj kaj goanz yaq mboq rux hawj minghkoan dij goanz baenzzaqrawz naeh, gaenqsu laek mbu.⁵ Gux haxdoq su baenz mbu gawz: Hoj mbu dij Sen, laux kaj goanz yaq, naengz rux aeu minghkoan dij goanz viangh bae dih dix aeu hoak dih chaenxfah naeh. Gux haxdoq su, hoj mbu dix.⁶ Haj do noagzog zux kai ndaej dit jenz ux, gaj dij Sen mboq rux lumz do rawz.⁷ Daengz koanto su dix naengz anq yaq. Laek mbu, gaenqsu biangz nyeuz noagzog lai."

Yuq Doqnaj Daenh Yinq Yezsuz

⁸ "Gux haxdoq su, nanghgaj gawz yuq doqnaj dij goanz yinq gux hoak Zaeuj, mwznaj gux Lug Dij Goanz yuq doqnaj bin dij Sen goj yinq dix hoak dij goanz gux.⁹ Gawz yuq doqnaj dij goanz mboq yinq gux hoak Zaeuj, mwznaj gux yuq doqnaj bin dij Sen goj mboq yinq dix hoak dij goanz gux.¹⁰ Gawz mang Lug Dij Goanz goj naengz rux ndaej yangq, gaj gawz lai Minghkoan dij Sen zawh mboq ndae, gawz zoq mboq ndaej yangq.¹¹ Daenh laeg su mwz rownzndawcowq, mwz doqnaj puj saeq daj puj miz najta gauq su zwzrawz, gaenqsu laek pyej hoakrawz yaeng.¹² Taeng zwz naeh, su hoj hax gaeng, Minghkoan dij Sen zoq yaix su hax gaeng."

Aen Bixliq Goanz Puj Saq Naeh

¹³ Dih goanzlai naeh miz goanz ux daj Yezsuz hax: "Lauxswz, vanz mawz yaix goz gux baen sownq gux hawj gux."¹⁴ Yezsuz hax: "Mawz ah, gawz yaix gux hoak puj saeh su dungzbaen ah?"

¹⁵ Yaq Yezsuz zoq daj daengzle hax: "Gaenqsu yauq caqsiq hem, laek maeux. Unj, daengz ngaenzjenz miz lowlaq, goj mboq rux hawj dij goanz do zaeu ndowj nyeuz." ¹⁶ Dix zoq daj paenqdix koanx aen bixliq ux: "Miz goanz puj saq ux, raehnaz dix yawz taeuq, ¹⁷ ndaw zaw dix nwh: 'Kaeujpyaek gux lai gvaq, dih aeu nyaengx mboq miz, hoakrawz hoak nix?' ¹⁸ Daeuq hax: 'Gux hoakzaqnaeh hoak: Gux lid sowh rownz mbaednduq gux aeu nyaengx kaeujpyaek naeh, daeuq daengj aen dwx tem, hoakzaqnaeh zux miz dih aeu daengzle kaeujpyaek daj za'hoq gux nyaengx. ¹⁹ Yaq, gux daj hoakri hax: "Bohjeq aj, mawz miz za'hoq ndae lai taeuq, doh mawz jin lai bi taeuq yah, jin vangqdangh, ngaiq jin ngaiq nyaeux, gvaq ngaihnggez!" ²⁰ Gaj dij Sen daj dix hax: 'Puj uaj aj, haemh naeh aeu aen mingh mawz, gaenq gaenqmawz hoak nyaengx naeh zawh gaenq gawz mux?' ²¹ Gawz saeh hoakri leux ngaenzjenz nyaengx dihndin, gaj mboq aeu ngaenzjenz hoak sowh gaenq kaeujzaw dij Sen naeh, gawz goj baenzaqnaeh."

Laek Pyej, Aeu Gaenq Jihzaq Nyaengx Ndaw Fax

²² Yezsuz daj cohsaenz dix hax: "Baenzaqnaeh, gux haxdoq su, laek pyej jin gaeng, goj laek pyej ndang hoakri nungh gaeng. ²³ Unj, aen mingh zungqyauq nyeuz gaenqjin lai loh, ndang zungqyauq nyeuz ndangnungh lai loh. ²⁴ Gaenqsu lez dij a: paenqdix mboq ndaem goj mboq caeu, goj mboq miz riangxkaeuj, dij Sen goj naengz zowngx paenqdix zaeu, gaenqsu biangz nyeuz dij noag lai loh. ²⁵ Gaenqsu miz saek goanz rux cholaeng ndaw zaw pyej ej hawj hoakri do zaeu gau ux mux?

²⁶ Daengz hawj hoakri do zaeu gau ux, dit saeh naeh naengz hoak mboq taeng, gaenqsu naengz pyej yowngh ndai hoak gaeng mux? ²⁷ Gaenqsu lez ndog'va, dix mboq kux, goj mboq yod'paij, gaj gux haxdoq su, daengz sowh ndangnungh yawz laux hongz Soaxloahmaenh nungh naeh naengz mboq ndeu sowh ndog'va naeh ndoag ux. ²⁸ Zaw su sinq dij Sen ix gvaq loh! Ndog'va ndaw doangh, vaenznaeh naengz yuq, vaenzbig zoq aeu viangh bae ndaw faez, gaj dij Sen goj naengz zang paenqdix, hawj paenqdix ndog yawz baenzaqnaeh, dij Sen hoakrawz mboq zang gaenqsu mux? ²⁹ Gaenqsu laek nwh jin gaeng, ndut gaeng, laek pyej gaeng. ³⁰ Unj le gaenqnaeh zawh dij goanz dihndin, zawh sowh puj mboq sinq dij Sen naeh nwh niakniak, gaj gaenqsu, Dez ndaw fax su ruxndeq su aeu gaeng. ³¹ Gaenqsu aeu Goh dij Sen nyaengxzaw nyeuz daengzle, dix haeggaj rux aeu gaenqjin, gaenqnungh hawj su. ³² Boangx ix inxnaeh aj, Dez ndaw fax su venq aeu goh dix hawj su, zoq zawh hax goh dij Sen daengzle zawh gaenq su, baenzaqnaeh su laek qiq. ^{33–34} Gaenq jihzaq su yuq rawz, zaw su zoq yuq rawz. Baenzaqnaeh, gaenqsu kai sowh gaenq gaenqsu miz naeh aeu hawj puj baenzluk, hoakzaqnaeh zoq zawh aeu nyaengx hawj hoakri, sowh gaenq jihzaq naeh zoq mboq rux naeuh, zoq mboq rux mowd. Hoakzaqnaeh gaenq biangz gaenq jihzaq zoq aeu nyaengx ndaw fax, zoq zawh dih puj laek mboq rux maz haenz, dih dij noan mboq rux gaet naeh.

Aen Bixliq Jiggaj Yowngh Puj koj Naeh

³⁵ "Gaenqsu dox ndae'ndowq, diamj daeng, ³⁶ daj puj koj taj zaeuj hoakri bae hoak qiag raep loz

dauh maz dungzlumj. Zaeuj dauh maz rownz, rongx paenqdix aj du gaurawz, paenqdix cenq aj du hawj dix. ³⁷ Zaeuj dauh maz taeng, leztaen puj koj jinh, sowh puj koj naeh zoq faengz yah. Gux haxdoq su, zaeuj toj qingj paenqdix jinkauej mboqyaq, dix koaxraengx qiat mbenghyauz, haeggaj kvej hawj paenqdix. ³⁸ Zaeuj byonghhwnz dauh maz gojndae, fax zaekgaj rungh dauh maz gojndae, jixzawh dix leztaen puj koj dix jinh, dix zoq doiq puj koj dix ndae mboqyaq. ³⁹ Gaenqsu ruxndeq, jixzawh zaeujrownz ruxndeq puj laek gaurawz maz, dix toj mboq rux hawj puj laek maz rownz. ⁴⁰ Baenzaqnaeh gaenqsu goj baenz dox ndae'ndowq taj. Baenzaqrawz mah? Sowh zwz gaenqsu nwh mboq taeng naeh, Lug Dij Goanz zoq daeuj."

⁴¹ Bihdowh hax: "Zaeuj aj, aen bixliq naeh, zawh daj piu hax rux zawh daj daengzle hax mux?"

⁴² Zaeuj yaeng: "Gaenqsu yauq hoakzaq goanz saeh zaeuj dix gvanx ndaw rownz naeh. Dix zawdoag kvej hawj zaeuj dix, hoak saeh lingj taeuq, Zaeuj dix aeu daengzle puj koj ndaw rownz hawj dix gvanx, hawj dix taeng zwz zoq baen gaenqjin hawj puj koj ndai, hoj hawj gawz gaj rawz zoq hawj gajrawz. ⁴³ Zaeujrownz dauh daeuj zwzrawz, leztaen dix hoakzaqnaeh hoak, Zaeuj doiq goanz puj koj naeh ndae mboqyaq. ⁴⁴ Gux haxdoq su swhlit, zaeuj dix toj aeu daengzle hawj dix gvanx nauq. ⁴⁵ Gaj gaenqsu laek hoakzaq goanz puj koj mbowq naeh. Ndaw zaw dix nwh: 'Zaeuj gux mboq rux dauh daeuj kvaiq baenznaeh,' yaq dix zoq dup puj koj zaiz, dup puj koj nyingz, yaq jin gaj zonghbaeg, ndut gaj laeuj, daengz laeujmiz saw. ⁴⁶ Gaj gux haxdoq su, sowh vaenz dix nwh mboq taeng naeh, sowh gau

dix mboq ruxndeq naeh, zaeuj dix zoq dauh daeuj, zaeuj dix zoq saep dix hoak jiggaj lit, hawj dix daj sowh puj mboq zawdoag kvej hawj zaeuj hoakri naeh zaemh yuq. ⁴⁷ Sowh puj koj ruxndeq zaeuj dix hawj dix hoak gaeng, gaj dix mboq dox taj, goj mboq biak kauq zaeuj dix bae hoak naeh, dix toj zoah dup naek mboqyaq. ⁴⁸ Gaj sowh puj mboq ruxndeq naeh, daengz hoak sowh saeh hoj dup naeh, dix goj cauz zoah dup. Zaeuj do aeu hawj gawz, Zaeuj zoq do daj gawz aeu. Zaeuj do aeu hawj gawz hoak, zaeuj zoq do daj gawz aeu.

Yeysuz Hawj Dij Goanz Daj

Dij Goanz Mboq Dungzhoj

⁴⁹ "Gux daeuj zawh aeu faez viangh bae dihndin, gux ngwz dix haeuz oq. ⁵⁰ Mwznaj miz saeh daeuj now to gux, gux baenz hoak sowh ux, daj sowh gau hoak diauq zauh soiq naeh naemx daeuj now to naeh dungzlumj. Mbaed saeh naeh naengz mboq baenz, gux yuqraix taeuq. ⁵¹ Gaenqsu faeklah gux zawh daeuj hawj dij goanz dihndin dungzndae mah? Mboq zawh naeuj, gux haxdoq su, gux zawh daeuj hawj dij goanz dihndin dungzdix. ⁵² Daeq vaenznaeh mwz, rownz ux haj goanz rux dungzjeng, sam goanz daj song goanz dungzjeng, song goanz daj sam goanz dungzjeng. ⁵³ Paenqdix rux dungzjeng, dez dix lug zaiz, lug zaiz dix dez, meh dix lug nyingz, lug nyingz dix meh, meh dix mijloz, mijloz dix meh."

Hoj Ruxndeq Zoh Naeh Miz Gaeng Saeh

⁵⁴ Yeysuz daeuj daj daengzle hax: "Gaenqsu leztaen baih tang'vaenz doak miz pajfax, zoq hax: 'Zaekgaj miz paen dwx yah' doaklaeng paen dwx

daeuj zaeh. ⁵⁵ Gaenqsu leztaen miz laemz daeq baih nanhfangz baeuq maz, zoq hax: 'Baenzhaeng yah,' doaklaeng goj baenzhaeng zaeh. ⁵⁶ Sowh puj baeg daj zaw mboq dungzlumj naeh aj, gaenqsu ruxndeq faxbyenq, gaj su baenzzaqrawz mboq ruxndeq sowh saeh hoak hawj zoh naeh lez naeh zawh hax gajraeng mux? ⁵⁷ Gaenqsu baenzzaqrawz mboq saeh hoakri nwh, gaeng zux zawh hoj mux? ⁵⁸ Jixzawh gawz gauq mawz, laeg mawz mwz dih puj saeq naeh, sowh gau naengz yuq doanhloh naeh, mawz baenz caqsiq daj dix dungzlaemh, hoj hoak rawz zoq hoak rawz, yaj dix laeg mawz mwz dih puj saeq naeh, puj saeq aeu mawz hawj bin, bin aeu mawz bae kaeng ndaw lauz. ⁵⁹ Gux haxdoq mawz, jixzawh sowh gaeng mawz zoah chaenxfah naeh, mawz naengz miz saek dit jenz kae mboq nauq, mawz mboq rux ndaej daeq ndaw lauz og daeuj."

Hoakloang Mboq Gaix Zoq Zoah Yah

13 ¹ Sowh gaunaeh, miz jij goanz ux yuq dihnaeh, paenqdix aeu suq saeh dij goanz Zazliqliq naeh haxdoq Yezsuz, zoq zawh zwz dij goanz Zazliqliq mbud dij Sen naeh, Bihlazdoz kaj paenqdix, hawj lowd paenqdix biad sowh gaeng mbud dij Sen naeh. ² Yezsuz hax: "Paenqdix zoah daenh kaj, hoakzaqnaeh tai, su faeklahi zawh paenqdix hoak loang dwx nyeuz dij goanz Zazliqliq ndai maj? ³ Gux haxdoq su, mboq zawh. Jixzawh gaenqsu hoak loang mboq gaix, su goj rux baenzzaqnaeh mboqyaq. ⁴ Koax daekgoanq, Cizloahyaq rownz laemx dip sipbiad goanz tai, su faeklahi sipbiad goanz naeh paenqdix hoak loang dwx nyeuz dij goanz Yezluqsaxlaengx ndai maj?

⁵ Gux haxdoq su, mboq zawh. Jixzawh gaenqsu hoak loang mboq gaix, su goj rux baenzzaqnaeh mboqyaq."

Aen Bixliq Go Maeg'vowh Mboq Miz Aen Naeh

⁶ Yezsuz aeu aen bixliq ux daj paenqdix hax: "Miz goanz ux, aeu go maeg'vowh ux daeuj ndaem ndaw sown maegkaeu'it dix. Doaklaeng dix maz cha maeg, gaj aen maeg rawz goj cha mboq taeng. ⁷ Dix daj goanz gvanx sown maegkaeu'it naeh hax: 'Mawz lez, sam bi naeh, gux maz dih go maeg'vowh inxnaeh cha maeg, gaj aen rawz goj cha mboq taen, taemj dix ndeh, yaj dix gaz ndaw sown daengzhwx.' ⁸ Goanz gvanx sown maegkaeu'it naeh hax: 'Zaeuj aj, leux dix bi ux tem mah, gux ndai dix, aeu pwnq dwk. ⁹ Jixzawh bi'mawq miz aen zoq leux dix, jixzawh mboq miz zoq taemj dix.'"

Yezsuz Yuq Vaenz Cednoiq Ux Ya

Goanzpuj chaej Ux Ndae

¹⁰ Miz Vaenz Cednoiq ux, Yezsuz yuq rownzndawcowq zau daenh. ¹¹ Miz goanz nyingz ux, zoah dij pi mwz ndang, chaej ndaej sipbiad bi, raengx gaeuzngaeu, in sw h mboq baenz. ¹² Yezsuz leztaen, zoq rongx dix maz, daj dix hax: "Yah nyingz, gux daem aen chaej mawz ni, mawz ndae eh!" ¹³ Yezsuz aeu song mungz baed ndang dix, dix cenq in sw h baenz, zoq biangz dij Sen. ¹⁴ Goanz gvanx rownzndawcowq naeh, leztaen Yezsuz yuq Vaenz Cednoiq ya chaej, zoq nyah, daj daengzle hax: "Miz choak vaenz hawj hoak gaengx, choak vaenz naeh gawz miz aen chaej goj hawj ya chaej, gaj vaenz daih jiat Vaenz Cednoiq mboq jinx ya

chaej." ¹⁵Zaeuj hax: "Gaenqsu sowh puj baeg daj zaw mboq dungzlumj naeh ah, daengz Vaenz Cednoiq su gawz goj hih zowg dij moaz, dij loix daeq ndaw langh daeuj, zung bae jin naemx naeujmax! ¹⁶Goanz nyingz naeh zawh luglan Yaqboahlazhanq, dix zoah Sazdanz puk sipbiad bi, mboq hoj yuq Vaenz Cednoiq hih zowg dix maj?" ¹⁷Hax nauq suq kauq naeh, sowh puj dix dix naeh laizlom, puj ndai zaemz suq dix hoak naeh, suq dix hoak naeh gaj yowngh gaj hawj daenh sawz taeuq.

Faenz Jeqchaiq Daj Fahfaenx

¹⁸Yezsuz hax: "Goh dij Sen lumj gaeng nix? Gux aeu gaeng bij dix nix? ¹⁹Dij goanz aeu faenz jeqchaiq ndaem ndaw sown hoakri,^z jeqchaiq gaj laeng gaj maj, maj baenz go dwx, daengz dij noag naengz daeuj ndaw ngah dix hoak mungx. Goh dij Sen daj gaenq naeh dungzlumj."

²⁰Dix daeuq hax: "Gux aeu goh dij Sen bij gaeng nix? ²¹Puj nyingz aeu i fahfaenx ux dwk bae ndaw sam deuh mux kaeujmeg, ^adoaklaeng daengzle gawh nauq. Goh dij Sen daj gaenqnaeh dungzlumj."

Hoj Daeq Baeg Du Gaep

²²Yezsuz mwz Yezluqsaxlaengx, gvaq zoah dih dwx dih ix, dix zau daenh goq mwz mwz. ²³Miz goanz ux cham dix: "Zaeuj aj, zawh mboq zawh miz goanz ix taeuq ndaej jeuq ah?" ²⁴Yezsuz daj daengzle hax: "Gaenqsu yauq caqsiq ndonj mwz baegdu gaep naeh. Gux haxdoq su, mwznaj miz dij

goanz lai taeuq zawx ndonj mwz, gaj mwz mboq baenz. ²⁵Taj taeng zaeujrownz dwnq maz ngaemz du, su zux yuq baihnog rongx aj du, hax: 'Zaeuj aj, aj du hawj piu mbaed'ux!' Dix zoq yaeng su: 'Gux mboq ruxndeq su daeq rawz maz.' ²⁶Taeng zwz naeh, su rux hax: 'Gaenqpiu ndaej daj mawz zaemh jin zaemh ndut, mawz goj ndaej yuq longq piu zau piu.' ²⁷Dix hax: 'Gux haxdoq su, gux mboq ruxndeq su daeq rawz maz, sowh puj mboq su naeh, ni gux bae naeuz gvae ux!' ²⁸Gaenqsu leztaen Yaqboahlazhanq, Yitsaeg, Yaqgowh, daj daengzle puj zawxkauq dij Sen yuq goh dij Sen zwzrawz, gaj gaenqsu zoah daem bae baihnog, taeng zwz naeh su yuq dih naeh haej gongz haej gongz, gaet faenz rongxqeu mboqyaq. ²⁹Taeng zwz naeh, miz dij goanz daeq baih tang'vaenz og naeh, baih tang'vaenz doak naeh, baih bowhfangz, baih nanhfangz, maz, yuq goh dij Sen naengh zongz jinkaeuj. ³⁰Gux haxdoq su, mbangj goanz gannaeh yuq doaklaeng, mwznaj rux ndaej yuq daekgoanq, mbangj goanz gannaeh ndaej yuq daekgoanq, mwznaj rux ndaej yuq doaklaeng."

Saeh Yezluqsaxlaengx Sezndai

³¹Sowh gaunaeh, miz jij goanz Fahliqsaiq ux maz daj Yezsuz hax: "Mawz ni inxnaeh ndeh, laux hongz Cizlih daz kaj mawz." ³²Yezsuz hax: "Gaenqsu mwz haxdoq do ma'bo gaengnaeh: 'Vaenznaeh, vaenzbig gux daem dij pi, ya chaej, vaenz daih sam saeh gux zoq hoak ndae yah.' ³³Gaj vaenznaeh, vaenzbig,

^z13:19 Faenz dix ix nyeuz faenz pyaek yowngh ndai lai.

^a13:21 Fahfaenx zawh sowh ux aeu daj naemx zaemh dwk bae ndaw mux kaeujmeg, aeu dwk ixux zuq rux hawj daengz boaj kaeujmeg gaj laeng gaj paуз, gaj laeng gaj gawh.

vaenzlwz, gux baenz goq daeq daeq mwz naj, mwz taeng Yezluqsaxlaengx zuxbaenz, unj puj zawxkauq dij Sen rawz rux yuq baihnog Yezluqsaxlaengx zoah kaj ah! ³⁴ Yezluqsaxlaengx aj, Yezluqsaxlaengx aj, mawz kaj puj zawxkauq dij Sen, daeuq aeu tin saeuh sowh puj dij Sen nemz daeuj dih mawz naeh tai. Gux lai mbaed taeuq daz rongx lug mawz maz zaemh yuq, daj dij gaeq meh rongx lug dix maz dawj bik dix dungzlumj, gaj su mboq venq. ³⁵ Lez mah, rownz su baenz dih mowz leux hawj su mboqyaq. Gux haxdoq su, daeq vaenznaeh mwz, su mboq rux ndaejtaen gux, taengdeg su hax: 'Ngwz dij Sen gumx goanz dij Sen nemz daeuj naeh!' ^b Su zux ndaej taen."

Yezsuz Ya Goanz Pujchaej Ndang Foak Ux Ndae

14 ¹ Miz Vaenz Cednoiq ux, Yezsuz mwz rownz goanz puj saeq dij goanz puj Fahliqsaiq ux jinkauej, daengzle zoq caqsiq lez dix. ² Zwz naeh, doqnaj Yezsuz miz goanz puj chaej ux baenz sowh chaej ndang foak naeh. ³ Yezsuz daj sowh lauxswz aeu *Sw Dij Sen* zau daenh naeh daj dij goanz Fahliqsaiq hax: "Vaenz Cednoiq hawj ya chaej vah?" ⁴ Paenqdix mboq goak. Yezsuz fowz goanz puj chaej naeh, ya aen chaej dix ndae, yaix dix daeq ni. ⁵ Yaq daeuq daj paenqdix hax: "Vaenz Cednoiq, lug zaiz su rux dij moaz su doak bae ndaw mboq, su mboq cenq laeg dix kwnj maz maj?" ⁶ Paenqdix dih hoakrawz yaeng mboq miz.

Laek Aeu Hoakri Hoak Dwz

⁷ Yezsuz leztaen puj qiag rownz goanz dij goanz puj Fahliqsaiq naeh lowg gaj pyaegzongz naengh,

dix zoq aeu bixliq daj paenqdix hax: ⁸ "Daenh qingj mawz mwz hoak qiag raep loz zwzrawz, laek naengh pyaegzongz, yaj puj qiag goanz qingj mawz naeh miz puj najta naengz dwx nyeuz mawz. ⁹ Goanz qingj mawz naeh rux zowz goanz najta dwx nyeuz mawz naeh maz daj mawz hax: 'Vanz mawz aeu aen naeh hawj dix naengh.' Sowh gaunaeh, mawz zoq najyaij, dauh bae tangzongz naengh. ¹⁰ Daenh qingj mawz zwzrawz, naengh tangzongz, taj goanz qingj mawz naeh maz daj mawz hax: 'Dungzbownh, mwz baihnog naengh.' Sowh gaunaeh mawz yuq doqnaj daengz zongz zux miz najta. ¹¹ Gawz aeu hoakri hoak dwx, gawz toj ndaej hoak ix mboqyaq; gawz aeu hoakri hoak ix, gawz toj ndaej hoak dwx mboqyaq."

¹² Yezsuz daeuq daj goanz qingj dix naeh hax: "Mawz hoak byaeuz rux hoak ngaiz qingj daenh jin zwzrawz, laek qingj dungzbownh mawz, bihnongx ndiang mawz, bihnongx mawz, rownz haenzhenz sowh puj baenzsaq naeh, yaj paenqdix daeuq qingj mawz bae jin, paenqdix daeuq boiz mawz. ¹³ Mawz qingj daenh maz jin zwzrawz, qingj sowh puj baenzluk naeh, qingj puj mboq miz qen ka naeh, qingj puj ka'ndiak, qingj puj ta'mbud. ¹⁴ Paenqdix yowngh aeu gaeng mbaiq mawz mboq miz, taj taeng vaenz sowh puj gaemz hax mboq miz naeh daeuq zaeu zwzrawz, dij Sen toj miz gaenq aeu mbaiq mawz mboqyaq. Baenzzaqnaeh mawz zoq faengz yah."

^b13:35 Gaemz kauq naeh haeuz yuq Sw Lownx 118:26.

Aen Bixliq Goanz Qingj Qiang Dwax Taeuq Naeh

¹⁵ Sowh puj daj Yezsuz zaemh zongz naeh miz goanz ux biak suq kauq naeh yaq, zoq daj Yezsuz hax: "Sowh dij goanz mwznaj ndaej yuq goh dij Sen jinkauej naeh faengz yah!" ¹⁶ Yezsuz daj dix hax: "Miz goanz ux hoak kaeujpyaek lai taeuq, qingj puj qiang goanz raengh taeuq. ¹⁷ Baenz naengh zongz maz, dix nemz puj koj dix bae daj sowh puj dix qingj naeh hax: 'Maz ndeh, gaj yowng h gaj hoak ndae eh.' ¹⁸ Gaj sowh puj dix qingj naeh goanz ux lej hax gaemz ux, goanz nduq hax: 'Gux swx oax raeh ux, baenz mwz lez mbaed ux zuxbaenz, mboq ndaej mwz ej, vanz mawz haxdoq zaeujrownz mawz gux mboq ndaej mwz eh.' ¹⁹ Goanz mawq hax: 'Gux swx sip do moaz, baenz bae ciq mbaed'ux zuxbaenz, vanz mawz haxdoq zaeujrownz mawz gux mboq ndaej mwz eh.' ²⁰ Goanz mawq hax: 'Gux hiamq aeu mez, mboq ndaej mwz eh.' ²¹ Goanz puj koj gaengnaeh dauh maz dih zaeuj dix, aeu suq kauq naeh haxdoq zaeuj dix, zaeujrownz zoq rik, daj puj koj dix hax: 'Bae ndaw chaenh, hangz dwax hangz ix, zowz puj baenzluk, puj mboq miz qen ka, puj ta'mbud, puj ka'ndiak maz.' ²² Yaq puj koj dauh maz, hax: 'Zaeuj aj, gux haeuz biak mawz bae hoak, gaj zongz naengz naengh mboq daem.' ²³ Zaeuj zoq daj puj koj dix hax: 'Mawz og ndaw chaenh bae, bae ka loh long, ka loh ix, laeg dij goanz maz, naengh daengz rownz gux daem nauq. ²⁴ Gux haxdoq su, sowh puj mbaednduq gux daz qingj naeh, goanz rawz goj mboq ndaej jimz kaeujpyaek gux.'"

Sowh Puj Zawx Hoak Cohsaenz

Yezsuz Naeh Hoj Hoakzaqnaeh Hoak

²⁵ Miz yowng h boangx goanz daj Yezsuz zaemh mwz, Yezsuz ueq bae daj paenqdix hax: ²⁶ "Jixzawh gawz maz dih gux inxnaeh, mboq ngaiq gux nyeuz bohme h hoakri, mijmez hoakri, lug hoakri, bihnongx zaiz hoakri, bihnongx nyingz hoakri, aen mingh hoakri, zoq mboq ndaej hoak cohsaenz gux. ²⁷ Gawz mboq baz maexngamzchaz hoakri nowngz gux, mboq venq cholaeng gux tai, gawz goj zoq mboq ndaej hoak cohsaenz gux. ²⁸ Gaenqsu miz saek goanz daengj rownz sung mboq suanq daekgoanq mux? Gawz goj suanq daekgoanq, lez bae gajrawz jenz, lez miz mboq miz jenz daengj. ²⁹ Jixzawh qix dej dix yaq, daengj daengz aen mboq baenz, gawz leztaen gawz goj kosaemj dix, hax: ³⁰ 'Goanz naeh naengz hax daengj rownz sung wzngah! Dix qix gaj dej dix yaq haeuz hoak mwz naj mboq baenz.' ³¹ Su ciq nwh, rux miz saek laux hongz mboq nwh ndae'ndowq daekgoanq zoq bae daj laux hongz ndai dungzsaeh mux? Dix toj nwh ndae'ndowq daekgoanq, lez aeu fanh goanz bin ux bae daj laux lingz song fanh goanz bin naeh dungzsaeh baenz mbaeuq. ³² Jixzawh dix nwh ingj baenz mboq ndaej, dix toj sowh gau baihaenh naengz yuq gvae naeh, zoq nemz dij goanz bae daj baihaenh vanz dungzhoj. ³³ Baenzaqnaeh, boangx su gawz gojndae, jixzawh mboq viangh gaenq hoakri nauq, zoq mboq ndaej hoak cohsaenz gux.

Sowh Gow Mboq Ndaengq Naeh

³⁴ "Gow zawh gaenq ndae, gaj jixzawh gow mboq ndaengq, naengz rux aeu gaeng hawj dix daeuq ndaengq mux? ³⁵ Sowh gow mboq ndaengq naeh, aeu dwk ndaw naz goj mboq baenz, aeu dwk ndaw pwnq goj mboq baenz, aeu viangh bae baihnog daengzhwx. Miz mbawchu rux biak, zoq caqsiq biak!"

Aen Bixliq Dij Mbej Lamq Naeh

15 ¹ Sowh puj caeu coiq naeh daj sowh puj hoak loang naeh maz haenz Yezsuz biak Yezsuz koanx. ² Dij goanz Fahliqsaiq daj sowh lauxswz zau *Sw Dij Sen* naeh zoq laemhkoan Yezsuz, paenqdix hax: "Goanz naeh ngaiq hawj puj hoak loang daj dix zaemh yuq, naengz daj paenqdix zaemh jinkaueuj." ³ Yezsuz zoq aeu aen bixliq ux daj paenqdix hax: ⁴ "Jixzawh boangx su gawz miz baeg do mbej ux, baeg do naeh, miz do ux lamq, dix toj jizzaz gaeujsip-gaeuj do naeh yuq ndaw doangh, yaq bae cha do lamq naeh, taengdeg cha taen zuxgah. ⁵ Cha taen yaq, dix zoq faengz nyauznyauz mbeg do mbej naeh dauh maz rownz. ⁶ Maz taeng rownz yaq, qingj dungzbownh daj sowh rownz dungzzawj naeh daeuj, daj paenqdix hax: 'Do mbej gux lamq naeh haeuz cha taen, su goj daj gux zaemh faengz!' ⁷ Gux haxdoq su, goanz hoak loang ux ndaw zaw gaix, ndaw fax goj zaemh how dix hoakzaqnaeh faengz, how dix faengz naengz faengz nyeuz how gaeujsip-gaeuj goanz puj ndae sowh puj mboq yungq gaix naeh lai.

Aen Bixliq Ngaenz Lamq Naeh

⁸ "Jixzawh miz goanz nyingz ux, miz sip ndeaj ngaenz, sip ndeaj ngaenz naeh, miz ndeaj ux doak bae rawz, dix toj diamj daeng, gvaed ndaw rownz, caqsiq cha, cha taen zux gah. ⁹ Cha taen yaq, dix zoq qingj dungzbownh daj sowh rownz dungzzawj naeh maz, daj paenqdix hax: 'Ndeaj ngaenz gux doak naeh haeuz cha taen, gaenqsu goj daj gux zaemh faengz.' ¹⁰ Gux haxdoq su, goanz hoak loang ux ndaw zaw dix gaix, Laux yuq doqnaj bin dij Sen naeh goj hoakzaqnaeh cho dix faengz."

Aen Bixliq Laux Miz Doiq Lug zaiz Ux Naeh

¹¹ Yezsuz daeuq hax: "Miz goanz ux miz doiq lug zaiz ux. ¹² Goanz lug zaiz daih ngih naeh daj dez dix hax: 'Dez, baen sownq gux hoj ndaej naeh hawj gux ndeh.' Dez doiq naeh zoq baen hawj doiq lug dix. ¹³ Gvaq ndaej jij vaenz ux, lug zaiz daih ngih caeu daengzle za'hoq nauq, ni rownz dix mwz dih gvae. Yuq dih gaengnaeh dix zaijenz faihfod, luanq hoak luanq bae. ¹⁴ Dix zaij daengzle gaenq dix miz naeh nauq, dih dix mwz naeh zoah zwz kaeujpyaek mboq yawz, zoah zwzyaeg, dix zoq baenz nanh. ¹⁵ Yaq dix zoq yuq dih naeh rownz ux hoak lugriangz, rownz naeh nemz dix bae ndaw doangh dawz dij mu. ¹⁶ Dix dongxyaeg gvaq, daengz sowh naeng chaengj dij mu jin naeh dix naengz zawx jin, daengz sowh naeh naengz mboq miz gawz aeu hawj dix. ¹⁷ Dix zux nwh taeng, hax: 'Dih naeh zoah zwzyaeg, gux yaeg daengz zaekgaj tai saw, gaj lugriangz rownz dez gux gaj goanz gaj miz gaenqjin, jin mboq nauq. ¹⁸ Gangzmaz gux loangzdin dauh mwz dih dez gux

naeh, daj dix hax: "Dez, gux hoak loang fax Sen, goj hoak loang mawz, ¹⁹ mboq paeq hoak lug zaiz mawz, mawz aeu gux hoak lugriangz mawz ndeh!" ²⁰ Yaq dix zoq loangzdin dauh maz dih dez dix naeh. Dix naengz yuq gvae taeuq, dez dix leztaen dix, zawchaej dix taeuq, lenh bae god hoz dix, goq zup zup dix. ²¹ Dix daj dez dix hax: 'Dez, gux hoak loang fax Sen, goj hoak loang mawz, mboq paeq hoak lug zaiz mawz.' ²² Gaj dez dix hoakzaqnaeh nemz puj koj: 'Aeu sowjriz gux gongz rawz ndae nyeuz aeu gongz rawz daeuj hawj dix nungh, aeu daeuj naeuz kvaic ux, aeu dingqmunz tw mwz mungz dix, nungh haiz hawj dix, ²³ aeu do moaz ix, do moaz jeng naeh maz kaj, hawj gaenqraeuz zaemh jin zaemh faengz.' ²⁴ Unj, lug zaiz gux daj tai yaq daeuj zaeu, lamq yaq daeuj ndaej dungzlumj." Yaq paenqdix daengzle zoq zaemh nyaeux faengz nyauz.

²⁵ "Zwz naeh, goanz lug zaiz dwx naeh yuq ndaw naz, gau dix zaekgaj maz daeux rownz naeh, dix ruxnyinz hiang lownx daj hiang tiauc, ²⁶ dix zoq rongx goanz puj koj ux maz, cham goanz puj koj naeh zawh gaeng saeh. ²⁷ Goanz puj koj naeh hax: 'Nongx zaiz mawz dauh maz, dez mawz leztaen dix dauh maz yuq ndae'ndowq, zoq kaj do moaz ix, do moaz aeu leux hoak jeng naeh.' ²⁸ Goanz lug zaiz dwx naeh zoq hoaknyah, mboq venq ndonj mwz rownz. Dez dix daeuj byongz dix mwz rownz. ²⁹ Gaj dix daj dez dix hax: 'Gux kvej mawz lai bi baenzaqnaeh, mawz yaix hoakrawz gux zoq hoakrawz, gaj mawz mboq sanz aeu hawj gux saek do mbej, hawj gux daj dungzbowh gux dungzgo, hawj piu zaemh nyaeux. ³⁰ Gaj goanz lug zaiz mawz naeh, daj puj kaingang zaemh yuq, zaijenz mawz

nauq, dix daeh dauh maz, mawz daeuj gajfa kaj do moaz ix, do moaz aeu leux hoak jeng naeh.' ³¹ Dez dix daj dix hax: 'Lug aj, mawz zwzzwz daj gux zaemh yuq, gaenq gux gaeng goj zawh gaenq mawz. ³² Gaj nongx zaiz mawz daj tai yaq daeuj zaeu, lamq yaq daeuj ndaej dungzlumj, gaenqraeuz hoj faengz nyauznyauz.'"

Aen Bixliq Goanz Gvanx Ndaw Rownz

Goanz Zaw Mboq Swh Naeh

16 ¹ Yezsuz daj cohsaenz dix hax: "Miz goanz ux, saeh goanz puj baenzsaq ux gvanx ndaw rownz. Miz dij goanz haxdoq zaeuj dix, hax dix langqfaeq ngaenzjenz zaeuj dix. ² Zaeuj dix rongx dix maz, daj dix hax: 'Miz dij goanz hax mawz langqfaeq ngaenzjenz gux, zawh baenzaqrawz raeuh mux? Hoakzaqnaeh mawz mboq ndaej saeh gux gvanx ndaw rownz gux yah. Aeu gaenq mawz gvanx naeh, hoak yowngh hoak yowngh laiz maz hawj gux.' ³ Goanz gaeng naeh ndaw zaw nwh: 'Zaeuj gux mboq hawj gux saeh dix gvanx, gux hoak gaeng ndae nyeuz mux? Hoakgaengx ej mboq miz doakriangz, dexkaeuj ej laizlom! ⁴ Oj! Gux ruxndeq hoakrawz hoak eh, gux hoakzaqnaeh hoak, taj gux mboq miz najgaengx zwzrawz, daenh goj zowz gux mwz rownz paenqdix ndowj.' ⁵ Yaq dix zoq hoak goanz hoak goanz rongx sowh puj baznij zaeuj dix naeh maz, hoakzaqnaeh cham goanz daekgoanq: 'Mawz baznij zaeuj gux gajrawz?' ⁶ Goanz baznij naeh yaeng: 'Baz baeg mbwnq yuz maeghit ux.' Dix zoq hax: 'Mbaw sw baznij mawz yuq inxnaeh, naengh daeuj, gaix dix hoak hajsip mbwnq ndeh!' ⁷ Daeuj cham goanz baznij mawq: 'Mawz baz

gajrawz?’ Goanz baznij naeh yaeng: ‘Baz baeg daeh kaeujmeg ux.’^c Dix zoq hax: ‘Mbaw sw baznij mawz yuq inxnaeh, aeu dix bae, gaix hoak biadsip daeh.’⁸ Zaeuj dix haenh dix hoaksaeh lingj. Su lez, sowh puj zawh yaiz lug dihndin naeh, paenqdix yuq dihndin hoaksaeh naengz lingj nyeuz sowh puj zawh yaiz lug gaenq rungh naeh.⁹ Gux haxdoq su, zwz naengz zaeu aeu ngaenzjenz dihndin bae cha dungzbownh, taeng zwz ngaenzjenz mboq miz luq naeh zwzrawz, paenqdix zoq raep su mwz ndaw zangjpungh daengznauq naeh.¹⁰ Dij goanz gawz saeh ix dix goj zawdoag hoak, saeh dwx dix goj zawdoag hoak mboqyaq; saeh ix dix naengz mboq zawdoag hoak, saeh dwx dix zoq gajfa mboq zawdoag hoak.¹¹ Jixzawh gaenqsu mboq zawdoag saeh dij Sen gvanx ngaenzjenz dihndin su, dix ndaej vangq aeu gaenq jihzaq zaeh naeh hawj su gvanx ah?¹² Jixzawh za'hoq daenh su mboq zawdoag saeh gvanx, gawz naengz aeu gaeng hawj su hoak gaenq gaenqsu ah?¹³ Goanz puj koj ux kvej song goanz zaeuj mboq baenz, dix toj rux hwnq goanz naeh nyeuz, ngaiq goanz naeh nyeuz, lez goanz naeh naek nyeuz, lez goanz naeh nawj nyeuz. Gawz hoak koj ngaenzjenz, gawz zoq hoak koj dij Sen mboq baenz."

¹⁴ Dij goanz Fahliqsaiq maeux ngaenzjenz taeuq, paenqdix ruxnyinz suq kauq naeh, zoq kosaemj Yezsuz.¹⁵ Yezsuz daj paenqdix hax: "Sowh gaenq dij goanz aeu hoak gaenq jihzaq naeh, dij Sen lez maz zawh gaenq ndoagndaeg. Gaenqsu yuq doqnaj

daenh hax hoakri zawh puj sw, gaj dij Sen ruxndeq zaw su.

¹⁶ "Daeq zwzndowj daeuj taeng jeh Yezhanq goanz saeh daenh hoak diauq zauh soi q naeh, miz sw fahlh dij Sen daj sw puj zawxkauq dij Sen. Yaq daeq jeh Yezhanq naeh maz zoq miz dij goanz aeu kauqfaengz goh dij Sen koanxdwk daenh, caqsiq qingj daengzle mwz goh dij Sen.^d ¹⁷ Fahlih dij Sen ndaej hoakzawz hax zoq hoakzawz hax, mboq rux byenq saek'i, daengz hawj fax daj dihndin mboq miz, naengz mboq byenq fahlh saek ngved saek diak.¹⁸ Gawz mboq aeu mijmez hoakri, daeuj raep yah mawq, dix zoq suanq zawh naengh puj ndai. Gawz raep sowh yah zoah po dix mboq aeu naeh, gawz goj suanq zawh naengh mijmez daenh.

Goanz Puj Baenzsaq Ux Daj Lazsazluq

¹⁹ "Miz goanz puj saq ux, ndangnungh nungh gaj gaenq ndae gaenq biangz gangq,^e gaenqjin jin lowlaq.²⁰ Daeuq miz goanz puj dexkaeuj ux, minxzh rongx hoak Lazsazluq, daengz ndang baenzmbaed miz nong, zoah daenh aeu dix nyaengx haenz baegdu rownz goanz baenzsaq naeh.²¹ Dix zawx zaep sowh gaenqjin doak haenz zongz rownz goanz baenzsaq naeh yaiyaeg, daengz dij ma naengz maz laix aen mbaed dix.²² Doaklaeng goanz dexkaeuj naeh tai, zoah bin dij Sen zowz dix mwz haenz Yaqboahlazhanq. Goanz puj saq naeh goj tai, aeu moak yaq.²³ Goanz puj saq naeh yuq dihndaem yuqraix taeuq, dix ngangh to lez, leztaen

^c16:7 Inxnaeh Baeg daeh kaeujmeg ux naek teq siq fanh lai gaen ux naeh.

^d16:16 Gaemz kauq naeh mbanjzwz goj rux hax gaenqnaeh: *Gaj goanz gaj dungzlongx mwz goh dij Sen.*

^e16:19 Mbaed nduq inxnaeh zawh hax: *Nunghsowj zaemq riz daj sowj mae'banq liak.*

Yaqboahlazhanq yuq gvae taeuq, Lazsazluq daj Yaqboahlazhanq zaemh yuq. ²⁴ Goanz puj saq naeh zoq rongx: ‘Puj jeq rownz gux Yaqboahlazhanq, zawchaej gux mah! Gux yuq ndaw faez inxnaeh yuqraix taeuq, vanz mawz nemz Lazsazluq aeu byai mungz yup i naemx ux daeuj daz linx gux, hawj linx gux zumx ixux mah.’ ²⁵ Yaqboahlazhanq hax: ‘Lug aj, mawz hoj nwhndaej zwz mawz naengz zaeu naeh gaenq ndae gaenq zaih mawz, mawz haeuz ndaej nauq, gaj Lazsazluq ndaej jinkaem, gannaeh dix ndaej yuqndae, gaj mawz ndaej yuqraix. ²⁶ Ka'ux, gaenqpiu daj gaenqsu goj miz ndoang ndaek dungzjeg, gawz zawx daeq inxnaeh kamj bae zawj su goj bae mboq baenz, gawz zawx daeq zawj su kamj maz zawj piu goj maz mboq baenz.’

²⁷ Goanz puj saq naeh hax: ‘Puj jeq rownz gux aj, haenx, vanz mawz nemz Lazsazluq bae rownz gux, ²⁸ saengq haj bihnongx zaiz gux, yaj paenqdix goj maz dih yuqraix inxnaeh.’ ²⁹ Yaqboahlazhanq hax: ‘Paenqdix haeuz miz *Sw Fahlih Moahciz* daj Sw puj zawxkauq dij Sen, nanghgaj paenqdix venq, paenqdix biak baenz.’ ³⁰ Goanz puj saq naeh hax: ‘Puj jeq rownz gux Yaqboahlazhanq aj, hoakzaqnaeh baenz mboq ndaej. Jixzawh miz dij goanz tai yaq daeuq zaeu, bae dih paenqdix naeh, paenqdix zoq gaix.’ ³¹ Yaqboahlazhanq hax: ‘Jixzawh paenqdix mboq biak kauq Moahciz daj puj zawxkauq dij Sen, daengz miz dij goanz tai yaq daeuq zaeu bae saengq paenqdix, paenqdix goj mboq venq sinq.’”